


柳田文庫  
文庫11  
D 292  
10





文庫 11  
D 292  
10

宋史卷四十三

本紀第四十三

開府儀同三司上柱國錄軍國軍事前中書右丞相監修國史領經筵事都總裁朕朕等修

皇明朝列大夫國子監祭酒 臣方從哲

承德郎右春坊右中允管國子監司業事 臣黃汝良等奉

勅重校刊

理宗三

四年春正月壬寅朔詔邊將毋擅興暴掠虐殺無辜以  
慰中原遺黎之望帝製訓廉謹刑二銘戒飭中外以李  
鳴復參知政事杜範同知樞密院事劉伯正簽書樞密  
院事余玠華文閣待制依舊四川安撫制置使知重慶

萬曆二十七年刊

宋史卷四十三

本紀

一



府兼四川總領財賦李曾伯寶章閣直學士依舊淮東  
安撫制置使知揚州兼淮西制置使戊午樞密院言四  
川帥臣余玠大小三十六戰多有勞效宜第功行賞詔  
玠趣上立功將士姓名等第卽與推恩庚申以余玠兼  
四川屯田使二月癸酉出封樁庫緡錢各十萬命兩淮  
京湖四川制司收瘞頻年交兵遺骸立爲義塚夏四月  
丁丑有流星大如太白出於尾癸未填星守太微垣乙  
未祈雨五月庚戌余玠言利閬城大獲山蓬州城營山  
渠州城大良平嘉定城舊治瀘州城神臂山諸城工役  
次第就緒神臂山城成知瀘州曹致大厥功可嘉乞擬  
賞以勵其餘詔致大帶行遙郡刺史丁巳武功大夫雄  
威軍都統制楊价世守南邊連年調戍播州捍禦勤瘁  
詔价轉右武大夫文州刺史戊午大元兵圍壽春府呂  
文德節制水陸諸軍解圍有功詔赴樞密院稟議發緡  
錢百萬請兩淮制司犒師庚申守關進勇副尉桂虎進  
義副尉楚富吐渾將虞侯鄭蔡捍禦壽春俱有勞效詔  
各官資兩轉給緡錢千乙丑前簽書樞密院事鄒應龍  
薨贈少保監察御史胡清獻劾淮西提刑徐敏子三罪  
詔削兩秩送江州居住六月庚午朔呂文德依舊侍衛  
馬軍副都指揮使兼淮西招撫使知濠州乙亥賜禮部



進士留夢炎以下四百二十四人及第出身有差壬午  
詔安豐軍策應解壽春圍將士補轉官資有差詔壽春  
一軍先涉大海擣山東膠密諸州有功今大元兵圍城  
能守城不隳其立功將士皆補轉有差乙未有流星大  
如太白出於畢丙申吳潛提舉隆興府王隆萬壽宮任  
便居住秋七月己亥朔祈雨乙卯招收沿淮失業壯丁  
爲武勝軍以五千人爲額辛酉盜發永州東安縣飛虎  
軍正將吳龍統制鄭存等討捕有功詔補轉官資有差  
甲子詔故直龍圖閣項安世正學直節先朝名儒可特  
贈集英殿脩撰八月壬辰太白晝見九月癸卯右丞相

史嵩之以父病謁告許之詔范鍾劉伯正暫領相事甲  
辰史彌忠卒贈少師封鄭國公賜諡文靖詔史嵩之起  
復右丞相兼樞密使癸丑熒惑填星合於軫甲寅京湖  
制司言諸將李福等破申州蔡州西平縣城壁及馬家  
等砦詔將士各補官推賞有差己未將作監徐元杰上  
疏論史嵩之起復宜許其舉執政自代帝不允遂求去  
帝曰經筵賴卿規益何事引去耶癸亥太白犯斗宿距  
星乙丑雷丁卯雷臺臣言嚴州及紹興蕭山等縣征商  
煩苛詔亟罷之冬十月甲戌詔慶元府守臣敦諭史嵩  
之赴闕嵩之控辭不允壬辰杜範游侶提舉萬壽觀兼



侍講十一月辛丑詔趣游侶杜範赴闕戊申雷庚戌詔  
陳韓李性傳赴闕十二月庚午以范鍾爲左丞相兼樞  
密使杜範爲右丞相兼樞密使游侶知樞密院事劉伯  
正參知政事兼簽書樞密院事詔戒飭百官許右丞相  
史嵩之終喪甲戌以趙葵同知樞密院事乙亥鄭清之  
授少保依舊觀文殿大學士醴泉觀使兼侍讀仍奉朝  
請進封衛國公

五年春正月丁酉朔詔更新庶政綏撫中原遺民丙午  
杜範辭免右丞相不允己酉雷乙卯以李性傳簽書樞  
密院事兼權參知政事二月丙寅朔雨土甲戌復五月

詔呂文德進三秩羊洪進二秩餘有戰功者推賞其陣

没人具姓名贈恤丁丑范鍾等上玉牒日曆及孝宗光  
宗御集經武要略寧宗實錄壬辰太白晝見經天三月  
庚子詔嚴贓吏法仍命有司舉行彭大雅程以升吳淇  
徐敏子納宥之罪準淳熙故事戒吏貪虐預借抑配重  
催取贏以緡錢百萬犒淮東師夏四月甲申填星犯上  
相星丙戌杜範薨贈少傅諡清獻戊子余玠言權巴州  
何震之守城死於兵詔進贈官三秩一子與下州文學  
京湖制司言鈐轄王雲等襲鄧州鎮平縣靈山戰順陽  
鐵檄峪皆有勞效野戰數十合雲等六人被重創死路



鈐於江一軍力戰詔王雲贈三秩仍官其二子爲承信  
郎王寬王立田秀董亮董玉各加贈恤於江等各轉一  
官資詔李曾伯余玠董槐孟珙王鑑職事脩舉曾伯玠  
升閣職槐珙鑑轉官並因其任五月丁酉呂文福夏貴  
上戰功詔貴官兩轉文福帶行閣職丁未詔沿江湖南  
江西湖廣兩浙制帥潛司及許浦水軍司共造輕捷戰  
船千艘置遊擊軍壯士三萬人分備捍禦戊申日生赤  
黃背氣辛亥詔董槐赴闕丁巳淮東制置使李曾伯辭  
免煥章閣學士從之六月甲申祈雨丙戌工部侍郎徐  
元杰暴卒贈四秩置詔獄秋七月癸巳朔日有食之旱

辛丑鎮江常州亢旱詔監司守臣及松江諸郡安集流  
民甲辰祈雨乙卯詔給徐元杰劉漢弼官田五百畝緡  
錢五千恤其家丁巳京湖制司言總制亢國用師衆戰  
裕州拐河戰墨山戰大神山皆有勞效詔國用官兩轉  
李山等四十七人官一轉呂文德言與大元兵戰五河  
隘口又戰於濠州大元兵還詔文德屯駐諸軍戰守將  
士推恩有差八月庚辰范鍾再乞歸田不允九月甲辰  
京湖制置司言劉整等率精銳以雲梯四面登鎮平縣  
城入城巷戰焚城中倉庫糧糧器甲路將武勝等四人  
死之略廣陽焚列屯砦柵廬舍凡二十餘所還抵靈山



又力戰有功詔整官兩轉同行蔡貴等二百二十人各  
官一轉辛亥祀明堂奉太祖太宗寧宗並侑大赦冬十  
一月乙未鄭清之乞歸田不允丙申詔師彌典司屬籍  
職事脩舉授太傅加食邑依前判大宗正事嗣秀王壬  
子詔大元兵入蜀權成都府馮有頌權漢州王驤權成  
都縣楊兌權資州劉永權潼川府魏壽死於官守其各  
贈官三轉仍官其一子癸丑詔將領關貴統制白傅才  
率眾復洋州還遇大元兵交戰將士百五十三人皆陣  
沒已祔饗閔忠廟贍恤其家關貴白傅才各贈承節郎  
官其一子進勇副尉十二月甲戌詔壽春守臣劉雄飛  
等以大元兵圍城捍禦有功雄飛及呂文福林子宗等  
十一人各官三轉劉用等補轉官資有差已卯以游似  
爲右丞相兼樞密使鄭清之爲少師奉國軍節度使依  
前醴泉觀使兼侍讀仍奉朝請賜玉帶及賜第行在兄  
與權換授安德軍節度使開府儀同三司萬壽觀使仍  
奉朝請弟嗣沂王貴謙嗣榮王與芮並授少保以趙  
葵知樞密院事兼參知政事李性傳同知樞密院事陳  
韓兼參知政事壬午太史奏來歲正旦日當食詔以是  
月二十一日避殿減膳命百司講行闕政凡可以消弭  
災變者直言毋隱



六年春正月辛卯朔日有食之置國用所命趙與憲爲  
提領官二月戊辰范鍾再乞歸田里詔官三轉觀文殿  
大學士醴泉觀使兼侍讀已巳范鍾再辭詔提舉洞霄  
宮任便居住庚午以劉雄飛知壽春府節制屯田軍馬  
三月癸巳日暈周匝珥氣夏四月辛酉太白晝見壬戌  
太陰犯太白甲戌以丘岳兼兩淮屯田副使賈似道兼  
蘄黃屯田副使丁丑日暈周匝戊寅詔朱熹門人胡安  
定呂燾蔡模並迪功郎本州州學教授給札錄其著述  
并條具所欲言者以聞閏四月辛卯李曾伯以臺諫論  
詔落職予祠尋罷祠祿戊戌呂文德言今春北兵攻兩  
淮統制汪懷忠等逾戰趙家園拔還俘獲人民路鈴夏  
貴知州王成倪政等帥舟師援安豐軍所至數戰將士  
陣亡者衆詔倪政贈官三轉官一子承信郎許通夏埜  
孫才江德仙各贈官兩轉官其一子下班祗應給緡錢  
恤其家餘立功將士恩賞有差辛丑月暈五重癸卯余  
玠言北兵分四道入蜀將士捍禦有功者輒以便宜推  
賞具立功等第補轉官資以聞詔從之五月庚申詔賈  
似道措置淮西山砦城築壬戌太白犯權星已卯詔諸  
鎮募兵造舟置馬帥臣其務獎激將士以嚴邊防六月  
甲午保信軍節度使希丞薨丙午祈雨壬子以陳韓參



知政事兼同知樞密院事乙卯臺臣言李鳴復劉伯正  
進則害善類退則蠹州里詔鳴復落職罷宮觀伯正削  
一秩秋七月壬戌泉州歲饑其民謝應瑞非因有司勸  
分自出私鈔四十餘萬糴米以振鄉井所全活甚衆詔  
補進義校尉丁卯太陰犯斗巳巳呂文德言北兵圍壽  
春城州師至黃家穴總管孫琦呂文信夏貴等戰龍堽  
有功詔文德官一轉餘依等第轉裨其陣沒董先等二  
十二人傷者四百三十七人贈恤恩賞有差癸酉有  
流星出自室大如太白八月辛卯太陰犯房巳酉賜文  
士劉克莊進士出身以爲秘書少監兼國史院編脩官

實錄院檢討官壬子太白晝見癸丑以劉克莊兼崇政

殿說書樞密院言前知會州何叔丁簽書判官楊仁舉  
淳祐元年冬北兵攻城兩家二十餘人死於難叔丁孫  
嗣祖仁舉幼子肖翁被俘逃歸詔叔下等贈官恤後有  
差九月甲子有流星出於斗大如太白戊辰以賈似道  
爲敷文閣直學士京湖制置使知江陵府兼夔路策應  
使太白晝見癸酉孟珙薨贈少師冬十月巳丑少保嗣  
榮王與芮之子賜名孟啓授貴州刺史乙未填星歲星  
熒惑合於亢巳酉太白入氐十一月癸亥歲星入氐甲  
戌右丞相游傑五請歸田里詔不允辛巳詔北兵入蜀



前四川制置使陳隆之闔家數百口罹害死不易節其特賜徽猷閣待制官其二子賜諡立廟死事史季儉楊戡子各賜官兩轉官一子十二月乙未詔史嵩之依所乞守金紫光祿大夫觀文殿大學士求國公致仕臺諫論史嵩之無父無君醜聲穢行律以無將之法罪有餘誅乞寢宮祠削官遠窳

七年春正月乙卯朔詔間者繼逐非才收召衆正史嵩之已令致事示不復用咨爾二三大臣其一乃心務舉實政以輯寧我邦家若辭浮於實玩愒歲月朕何賴焉

建資善堂授孟啓宜州觀察使就內小學二月庚寅詔

淮安主簿周子銘久存於北數遣蠟書謀報邊事今遂生還可改朝奉郎優與升擢己亥貴妃賈氏薨戊申日暈周匝壬子詔改潛邸爲龍翔宮三月庚午祈雨夏四月丁亥填星犯亢庚子以王伯大簽書樞密院事吳潛同簽書樞密院事辛丑以鄭清之爲太傅右丞相兼樞密院使封越國公游侶罷爲觀文殿大學士醴泉觀使兼侍讀趙葵爲樞密使兼參知政事督視江淮京西湖北軍馬陳鞞知樞密院事湖南安撫大使知潭州甲辰趙葵兼知建康府行宮留守江東安撫使應軍行調度並聽便宜行事趙希堅禮部尚書督視行府參贊軍事



庚戌出緡錢千萬銀十五萬兩祠牒千緡萬并戶部銀  
五千萬兩付督視行府趙葵調用五月甲寅寧淮軍統  
制張忠戍浮山手搏北將俱溺水死贈武略大夫官一  
子承信郎緡錢五千給其家祈雨壬申以吳潛兼權參  
知政事乙亥御集英殿策士詔求直言弭旱六月癸巳  
賜禮部進士張淵微以下五伯二十七人及第出身有  
差丙申以旱避殿減膳詔中外臣僚士民直陳過失毋  
有所諱戊申詔旱勢未釋兩淮襄蜀及江閩內地曾經  
兵州縣遺骼暴露感傷和氣所屬有司收瘞之秋七月  
己未太陰犯心乙丑吳潛罷丁卯以別之傑參知政事

鄭杲同簽書樞密院事己卯吳潛依舊端明殿學士知  
福州福建安撫使八月甲申鄭杲罷辛卯雨辛丑前彭  
州守臣宇文景訥死事詔贈官進三秩官一子下州文  
學壬寅詔監司守臣議荒政以振乏絕租稅合蠲減者  
具實來上甲辰高定子薨贈少保丙午蔡抗進其父沈  
尚書解九月丙辰有流星出於室癸酉雷冬十月辛巳  
太白晝見己酉臺臣言添差攝局須入奏辟改任薦舉  
借補曠職匿過十弊十一月丁巳謂茶陵知縣事黃端  
卿爲郴寇所害進官三秩官一子將仕郎立廟衡州十  
二月辛巳李鳴復卒壬辰詔太學生程九萬自北脫身



來歸且條上邊事賜迪功郎

八年春二月丁亥趙葵言呂文德洎諸將解泗州之圍有功詔補轉推賞有差戊子太陰生黃白暈癸巳雨雹乙未福州福安縣民羅母年過百歲特封孺人復其家敕有司歲時存問以厚風化辛丑趙葵表招泗斷橋將士用命兵退陳奕譚洵玉王成等戰渦河龜山有勞聞其步兵多山東人遂調史用政等襲膠州復襲高密縣以牽制侵淮之師詔趣上立功將士等第姓名推賞乙丑雨雹甲戌詔先鋒軍統制田智潤泗州潮河堤之戰父子俱死於兵贈智潤脩武郎子承節郎更官一子承

信郎給緡錢五千恤其家夏四月庚辰詔淮東制置司於泗州立廟祠夏臯及張忠田智潤父子賜額以旌忠節丁亥贈朝奉郎程克巳妻王氏同没主事進贈安人五月癸丑趙葵進三秋六月乙酉日生赤黃暈周匝戊戌以徐鹿卿爲樞密使兼參知政事兼侍講甲辰有流星出河鼓大如太白秋七月戊申太白入井辛亥以王伯大參知政事應劭同知樞密院事謝方叔簽書樞密院事史宅之同簽書樞密院事趙與憲資政殿學士依舊知臨安府浙西安撫使癸酉王伯大罷爲資政殿學士知建寧府九月辛酉祀明堂大赦雷冬十月甲戌朔



別之傑三疏乞歸田里詔以資政殿大學士知紹興府  
乙亥應繇謝方叔並兼參知政事己卯余玠言都統制  
張實等以戰功承制使宜與官三轉給刺史象符金銀  
器二百兩銀三百兩緡錢一萬餘將士依等第轉官給  
金銀符錢帛有差詔命詞給告身付之

九年春正月乙巳孟啓授慶遠軍節度使進封益國公  
庚申詔周世宗八世孫柴彥穎補承務郎襲封崇義公  
辛酉詔兩淮京湖沿江曠土軍民從便耕種秋成日官  
不分收制帥嚴勸諭覺察癸亥詔給官田五百畝命臨  
安府創慈幼局收養道路遺棄初生嬰兒仍置藥局療

貧民疾病乙丑雨雹丁卯許應龍薨己巳范鍾薨贈少  
保諡文肅辛未詔以官田三百畝給表忠觀旌錢氏功  
德仍禁樵採閏二月甲辰以鄭清之爲太師左丞相兼  
樞密使進封魏國公趙葵爲右丞相兼樞密使應繇謝  
方叔並參知政事史宅之同知樞密院事乙卯鄭清之  
五辭免大師許之三月癸未以賈似道爲寶文閣學士  
京湖安撫制置大使乙酉程元鳳江淮等路都大提點  
坑冶鑄錢公事兼知饒州丁亥詔以四月朔日食自二  
十日避殿減膳徹樂夏四月壬寅朔日有食之庚戌趙  
葵四辭免右丞相兼樞密使詔不允五月己丑趙葵乞



歸田里又不允甲午鄭寀薨六月壬戌晝南方有星急  
流至濁没大如太白丙寅詔邊郡各立廟一賜額曰褒  
忠凡没於王事忠節顯著者並祠焉守臣春秋致祀秋  
七月壬辰詔知吉州李義山更削三秩監贓錢銀納安  
邊所癸酉太白犯進賢星八月己酉以吳潛爲資政殿  
學士知紹興府浙東安撫使辛亥詔趣趙葵治事命吳  
淵宣諭赴闕九月丙子詔趙與憲提領戶部財用置新  
倉積貯百二十萬名淳祐倉許辟官四人乙未冊命婉  
容閻氏爲貴妃冬十月辛丑太白入氐丁卯諫臣周坦  
言知建寧府楊棟任成都制幕時盡載激賞庫珍寶先

遁陷丁黼於死致全蜀生靈塗炭詔褫棟閣職罷新任

十一月辛未太白入氐壬申有流星出自織女星丙子  
趙與憲資政殿學士提領國用浙西安撫使癸未應繇  
乞歸田里詔以資政殿學士知平江府十二月己亥以  
董槐兼侍讀乙巳以吳潛同知樞密院事兼參知政事  
徐清叟簽書樞密院事戊申太白晝見戊午史宅之薨  
贈少師

十年春正月甲午應繇三乞歸田里與祠祿二月乙卯  
雨土三月癸未趙葵辭以爲觀文殿大學士醴泉觀使  
兼侍讀奉朝請庚寅以賈似道爲端明殿學士兩淮制



置大使淮東安撫使知揚州余玠龍圖閣學士職任依舊李曾伯徽猷閣學士京湖安撫制置使知江陵府丙申有流星夕殞夏四月己酉幸龍翔宮五月丙寅朔以福州觀察使提舉佑神觀善珊爲保康軍節度使提舉萬壽觀嗣濮王吳淵資政殿學士依舊職任與執政恩數癸未賈似道言王登浚築江陵城濠有勞詔登初官選人減舉主三員八月甲寅台州大水九月甲子朔賈似道兼淮西安撫使己巳賜禮部進士方夢魁以下五百一十三人及第出身有差甲戌進士第一名方夢魁改賜名逢辰戊寅以嚴州水復民田租冬十月丁酉詔

郡邑間有水患其被災細民隨處發義倉賑之辛酉詔諸主兵官今後行罰毋杖脊以傷人命十一月壬申趙葵授特進依舊觀文殿大學士判潭州湖南安撫大使壬午雷癸未以雷震非時自二十四日避殿減膳詔公卿大夫百執事各揚乃職禪朕不逮參知政事謝方叔吳潛簽書樞密院事徐清叟並乞解機政詔不允十二月壬辰朔鄭清之乞歸田里詔不允戊戌太白歲星合於危丁巳虹見

十一年春正月丁卯詔孟啓改賜名孜依前慶遠軍節度使進封建安郡王己丑詔公海公江州郡中嚴水軍



宋史卷四十三  
本紀  
十四  
之制監察御史程元鳳言資善堂宜選用重厚篤實之士上嘉納之二月乙未左丞相鄭清之等上玉牒日曆會要及光宗寧宗寶訓寧宗經武要略丁酉詔清之等各進秩有差庚子游侂乞致仕詔依舊觀文殿大學士進二秩甲寅太白犯昴乙卯太白晝見三月丁卯少保保寧軍節度使嗣濮王不擅薨贈少師追封新興郡王乙亥雨土戊寅以謝方叔知樞密院參知政事吳潛參知政事徐清叟同知樞密院事辛巳城寶應詔移一軍戍守李庭芝進一秩將士推恩有差俞興升成都安撫副使知嘉定府任責威茂黎雅邊防夏四月戊戌潭州

吳林符三世孝行一門義居福州陳氏笄年守志壽逾

九泰詔皆旌表其門丁未進淳祐條法事類凡四百三十篇鄭清之等各進二秩六月甲午四川余玠奏進北馬五百詔立功將士趣上姓名推恩丙申高達帶行遙郡刺史權知襄陽府管內安撫節制屯戍軍馬乙巳詔求遺書并山林之士有著述者許上進秋七月癸亥太白晝見丙寅太陰入氐壬申太白入井丁丑有流星出於畢大如太白庚辰前簽書樞密院事陳卓薨贈少師八月己丑朔流星夕墮癸巳太陰入氐丁酉熒惑入井丁未命呂文福廬州駐劄御前諸軍都統制庚戌詔以



故直龍圖閣樓昉所著中興小傳百篇宋十朝綱目并撮要二書付史館謄寫昉追贈龍圖閣待制辛亥詔比覽林光世易範明易推星配象演義有司其以禮津遣赴闕九月辛未祀明堂大赦閏十月癸丑太白入氐癸酉吳潛五疏乞罷機政不允十一月丙申京湖制司表都統高達等復襄樊詔立功將士三萬二千七百有二人各官一轉以緡錢三百五十萬犒師甲辰鄭清之乞解機政詔依前太傅保寧軍節度使克醴泉觀使封齊國公仍奉朝請己酉詔承信郎陳忠獻書籍賜官一轉

庚戌太師鄭清之薨贈尚書令追封魏郡王謚忠定甲寅以謝方叔爲左丞相吳潛爲右丞相乙卯以徐清叟

參知政事兼同知樞密院事董槐端明殿學士簽書樞密院事十二月戊辰詔以八事訓飭在廷曰肅紀綱用正人救楮幣固邊陲清吏道淑士氣定軍制結人心己卯游侶薨贈少師謚清獻

十二年春正月癸巳武功大夫王堅以復興元功轉遙郡團練使辛丑太學錄楊懋卿以孝行卓異詔表其門以其事宣付史館癸丑詔宰執議立方田開溝澮自近圻始創置遊擊軍水步各半二月乙卯朔日有食之己未詔陳顯伯資善堂翊善蔡抗資善堂贊讀翁甫資善



堂直講壬午詔襄郢新復州縣賦稅復三年大元兵數  
萬攻隨郢安復京西馬步軍副總管馬榮率將士戰嚴  
竇山癸未再戰銅冶坪三月丁亥又戰子陵大春山詔  
榮兵不滿千能禦大難賞官兩轉進州鈐帶行閣門祇  
候賜金帶諸將王成楊進各官兩轉升遷餘推恩有差  
丁未守三汉口諸將焚北屯積蓄斷其浮梁夏四月庚  
申有流星出自角亢大如太白戊辰詔襄郢新復州郡  
耕屯爲急以緡錢百萬命京閩措置給種與牛壬申熒  
惑犯權星乙亥蔡抗兼侍立脩注官丙子置池州遊擊  
水軍五月甲申朔祈雨壬辰詔申儆江防每歲以葺戰  
艦練舟師勤惰爲殿最賞罰乙巳盜起信州玉山縣罷  
諸郡經界戊申太陰犯畢六月癸亥發米三萬石振衢  
信饑玉山寇平丙寅嚴衢婺台處上饒建寧南劍邵武  
大水遣使分行振恤存問除今年田租秋七月庚寅太  
白熒惑合於軫八月己未詔來年省試仍舊用二月一  
日殿試用四月十五日以前庶免滯留遠方士子己巳  
詔以緡錢四十萬振恤在京軍民丁丑詔行會天曆辛  
巳詔改明年爲寶祐元年九月丁亥少師保康軍節度  
使嗣沂王貴謙薨贈太傅追封申王戊戌太白填星合  
於箕丙午太白犯斗冬十月癸丑以徐清叟參知政事



董槐同知樞密院事嗣濮王善珮薨贈少師追封咸寧郡王戊午濮安懿王長孫善與授福州觀察使提舉佑神觀嗣濮王壬申詔襄樊已復其務措置屯田脩渠堰十一月庚寅吳潛罷丙申夜臨安火丁酉夜火乃熄戊戌詔避殿減膳壬寅詔求直言十二月乙卯以吳潛爲觀文殿大學士提舉江州太平興國宮己未詔追錄彭大雅翔城渝州功復承議郎官其子癸亥詔海神爲大祀春秋遣從臣奉命往祠奉常其條具典禮來上壬申太陰入氏丁丑立春雷

寶祐元年春正月庚寅朔詔以藝祖嫡系十一世孫嗣

榮王與芮之子建安郡王孜爲皇子改賜名禔授崇慶軍節度使進封永嘉郡王製資善堂記賜皇子戊戌日生戴氣癸卯大元兵渡漢江屯萬州入西柳關高達調將士扼河關上山大戰至鰲坑石碑港而還詔高達程大元李和各官兩轉餘恩賞有差二月己酉朔日有食之戊辰陳垓貪贓不法竄潮州辛未罷尚書省翔置呈白房三月戊子與芮授少師加食邑七百戶希遷檢校少傅加食邑五百戶與懽授少保加食邑七百戶乃裕保康軍節度使加食邑五百戶丙申別之傑薨贈少師夏四月丁巳有流星大如太白五月甲午詔余玠赴闕



乙未詔侍從臺諫給舍制司各舉帥才二人丁酉熒惑  
歲星合在昴己亥賜禮部進士姚勉以下及第出身有  
差六月戊申朔江湖閩廣旱庚戌四川制司言余玠疾  
革詔玠資政殿學士與執政恩數辛亥以賈似道爲資  
政殿大學士李曾伯端明殿學士職任依舊庚申以余  
晦爲司農卿四川宣諭使祈雨秋七月壬午王伯大薨  
丙戌蔡抗兼資善堂翊善施退翁兼資善堂直講庚寅  
溫台處三郡大水詔發豐儲倉米并各州義廩振之癸  
巳詔余玠以興元歸附之兵分隸本路諸州都統務撫  
存之仍各給良田制司濟以錢粟甲午余玠卒贈官五  
轉典子以董槐兼參知政事癸卯詔撫諭四川官吏軍  
民八月丁未朔以馬光祖爲司農卿淮西總領賊賦甲  
寅起居郎蕭泰來出知隆興府先是起居舍人牟子才  
與泰來並除子才四疏辭極陳泰來姦險汚穢吐與泰  
來伍泰來不得已請祠遂予郡丙辰以余晦權刑部侍  
郎四川安撫制置使知重慶府兼四川總領財賦乙丑  
行皇宋元寶錢九月壬午程元鳳升兼侍讀牟子才升  
兼侍講壬辰城夔門太陰入畢冬十月丙午朔詔出緡  
錢二百萬振恤京城軍民十一月丙子朔詔獎諭襄陽  
守臣高達己丑賈似道獻所獲良馬賜詔褒嘉其將士



增秩賞賚有差十二月乙卯冊瑞國公主庚申劉伯正  
薨贈五秩

史卷四十三 終

宋史卷四十四

本紀第四十四

開府儀同三司上柱國錄軍國事兼中書右丞相監國史顧經筵事都總裁脫脫等

皇明朝列大夫國子監祭酒 臣 方從哲

承德郎右春坊中允管國子監司業事 黃汝良等奉

勅重校刊

理宗四

二年春正月乙亥朔大元城利州閬州詔湘潭縣民陳  
克良孝行表其門二月甲辰朔詔太常釐正秦檜諡因  
諭輔臣曰諡繆狠可也熒惑犯權星乙巳詔利州統制  
呂達戰沒贈官四轉官一子承信郎一子下班祗應已

萬曆二十七年刊



酉余晦兼四川屯田使庚申詔饒州布衣饒魯不事科舉一意經學補迪功郎饒州教授辛酉日暈周匝戊辰故直華文閣李燔先儒朱熹門人賜諡文定三月壬午王善使大元留七年來歸戊子雪詔蠲江淮今年二稅已丑詔錄襄城功高達帶行環衛官遙郡團練使職任依舊王登行軍器監丞制司參議官程大元李和以下將士六千六百一十三人補轉官資有差甲午城東海賈似道以圖來上夏四月辛亥詔邊兵貧困可闕閒田甚多擇其近便者分給耕種制司守臣治之乙丑以徐清叟知樞密院兼參知政事董槐參知政事六月壬寅

朔罷臨安府臨平鎮稅場甲辰四川制司言合州廣安軍北兵入境王堅曹世雄等戰禦有功詔堅官兩轉餘各補轉官資甲寅侍御史吳燧等論故蜀帥余玠聚斂罔利七罪玠死其子如孫盡竊帑庾之積以歸詔簿錄玠家財以李曾伯爲資政殿學士依舊節制四川丙辰利州王佐堅守孤壘降將南未忠以兵薄城下佐罵之未忠流涕而退初隆慶教授鄭炳孫不從南未忠降先縊死其妻女亦朝服自縊詔獎諭佐進官一秩炳孫贈朝奉郎直祕閣仍訪其子官以文資王伯大乞致仕詔進一秩允所請丁巳以賈似道同知樞密院事職任依



舊庚午詔余晦赴闕閏六月壬申董槐疏蜀事孔棘願  
假臣宣撫之名置司夔門以通荆蜀上優詔答曰士大  
夫以事功自勉者鮮卿請帥蜀足見忠壯然經理西事  
當在廟堂宜竭謀猷以副委任詔蒲擇之暫權四川制  
置司事甲戌錄嘉定戰功先是大元兵圍城五旬帥守  
俞興元用等夜開關力戰而圍解詔俞興等十六人各  
官五轉將士補轉有差以包恢提點浙西刑獄招捕莪  
浦鹽寇乙亥台州海寇積年民罹其害路分董櫛洎進  
士周自中等擒獲詔櫛官一轉餘推賞有差壬午以李  
會伯為四川宣撫使兼京湖制置大使進司夔路詔賜

會伯同進士出身能江灣浮鹽局戊戌大元使離揚州

北歸秋七月己酉詔前蜀帥余玠鎮撫無狀兵若於征  
戍民困於徵求茲俾其家輸所取蜀財犒師振民並邊  
諸郡田租其復三年詔思播兩州連年捍禦其守臣田  
應庚楊文各官一轉餘推恩詔賈似道開闔以樞密行  
府為名庚戌有流星大如太白甲寅故光祿大夫賈涉  
諡忠肅壬戌復安西堡己巳荻浦海寇平包恢進直龍  
圖閣劉達授橫行帶遥郡李性傳赴闕以王堅為興元  
都統兼知合州八月己亥詔以前知閬州兼利西安撫  
王惟忠付大理獄尋命臺臣監鞫辛巳徐清叟乞罷機



務詔不允癸巳謝方叔等上玉牒日曆會要及七朝經  
武要略中興四朝志傳詔方叔徐清叟董槐等各進秩  
戊戌籍王惟忠家財九月辛亥祀明堂大赦辛酉詔詣  
西太一宮爲國祈祥起居郎牟子才再疏諫而止丙寅  
詔戒外戚毋干請詔山陰蕭山諸暨會稽四縣水其除  
今年田租丁卯太白晝見冬十月庚午朔謝方叔等進  
寶祐編吏部七司續降條令癸酉皇子祺進封忠王甲  
午斬王惟忠於都市丁酉追削余玠資政殿學士奪其  
子晦刑部侍郎告身戊戌段元鑑上隆慶堡戰功十一  
月壬寅日南至忠王寇丁未大元城光化舊治十二月

庚午排保甲行自實法癸未雷四川苦竹隘捷至甲午  
隆慶部兵周榮被獲歸北密約段元鑑入隘解圍事覺  
就禽不屈而死馬徽白端戰歿詔四川宣撫司爲之立  
廟安西堡受攻五月將士力戰解圍居民以資糧助軍  
實詔四川宣撫司具名推恩在城人並賞一資復租賦  
五年余玠男如孫徵所認錢三千萬將足詔如孫削三  
秩勒停

三年春正月己未迅雷巴州捷至庚申城均州龍山起  
居郎牟子才上疏言元夜張燈侈靡倡優下賤竒技獻  
笑媒汚清禁上累聖德今因震霆示威臣願聖明覺悟



天意可回帝納其言壬戌詔宗正寺所擬宗子名以用  
宜季次紹五字續大由友嗣甫之下二月乙亥詔右千  
牛衛上將軍乃猷授蘄州防禦使奉沂靖惠王祠事兼  
給事中王埜言國家與大元本無深仇而兵連禍結皆  
原於入洛之師輕啓兵端二三狂妄如趙楷全子才劉  
子澄輩輕而無謀遂致隻輪不返全子才誕妄慘毒今  
乃援劉子澄例自陳改正乞寢二人之命罷其祠祿以  
爲喪師誤國之戒從之己卯復廣陵堡城賈似道以圖  
來上壬午詔發緡錢二百萬給四川調度乙酉詔以告  
身祠牒新會香鹽命臨安府守臣馬光祖收換兩界舊  
鐵會子三月己酉詔沿邊耕屯課入登羨管屯用官推  
賞荆襄兩淮及山砦如之庚戌邵武寇平癸丑詔自實  
法宜寬期限監司守臣其嚴戢吏姦毋煩擾民以吳淵  
爲觀文殿學士京湖制置使知江陵府己未雨土夏四  
月乙酉以江萬里知福州福建安撫使五月久雨丁未  
以監司州郡辟書冗濫詔申嚴禁止己酉李性傳薨辛  
酉太陰入畢嘉定大雨雹與叙南同日地震浙西大水  
六月辛未大風甲戌太陰入氐丙戌李全子松壽葺舊  
海城窺海迫賈似道調兵敗之勅書獎諭趣上立功等  
第姓名推賞戊子洪天錫劾內官盧允叔董宋臣疏不



報竟去詔遷太常少卿辛卯王埜以御史胡大昌言罷  
給事中依舊端明殿學士提舉洞霄宮秋七月辛丑太  
陰入氏癸丑以呂文德知鄂州節制鼎澧辰沅靖五州  
丙辰謝方叔徐清叟以御史朱應元言罷辛酉有流星  
大如太白詔二省樞府機政令董槐程元鳳輪日判事  
取旨壬戌以謝方叔爲觀文殿大學士提舉臨安府洞  
霄宮八月乙丑朔以董槐爲右丞相兼樞密使程元鳳  
簽書樞密院事權參知政事蔡抗爲端明殿學士同簽  
書樞密院事徐清叟資政殿學士提舉玉隆萬壽宮任  
便居住丁卯歲星熒惑在柳巳巳太陰在氏馬光祖兼  
節制和州無爲安慶三郡屯田使丙子鄭性之薨庚寅  
福建安撫江萬里以臺臣李衢言罷新命提舉武夷山  
冲佑觀辛卯應繇薨九月甲午朔雷丙午以徐清叟爲  
資政殿學士提舉洞霄宮丙辰陳顯伯兼資善堂翊善  
皮龍榮兼資善堂贊讀壬戌權中書舍人陳大方言劉  
子澄端平入洛之師賈勇贊決北兵方入唐州界子澄  
已率先遁逃一敗塗地二十年來爲國家患者皆原於  
此宜投之四裔詔罷子澄祠祿冬十月甲戌太白晝見  
丁丑有流星出自畢十一月丁丑榮惑犯太微垣上相  
星十二月乙丑嗣濮王善奭薨丙子少傅節度使與權



薨贈少師追封奉化郡王

四年春正月乙未詔謝方叔奪職罷祠謝脩削三秩勒  
停乙巳太陰犯歲星巳酉太陰犯熒惑辛亥以吳淵爲  
京湖制置使兼夔路策應使軍馬急切便宜行事庚申  
蜀閫奏捷辛酉詔史嵩之觀文殿大學士依前金紫光  
祿大夫未國公致仕二月戊辰雨雹丙子詔襲封衍聖  
公孫孔洙添差通判吉州不釐務三月壬寅以少師嗣  
榮王與芮爲太傅乙卯日暈周匝丙辰帝製字民訓賜  
改秩親民官夏四月庚午日暈周匝癸未以程元鳳參  
知政事蔡抗同知樞密院事賈似道參知政事職任依  
舊李曾伯資政殿大學士福建安撫使吳淵進二秩職  
任依舊吳潛沿海制置使判慶元府馬光祖煥章閣直  
學士職任依舊五月甲午孫夢觀兼資善堂贊讀章鑑  
兼資善堂直講先聖五十代孫孔元龍賜迪功郎授初  
品官甲辰羅氏鬼國遣報思播言大元兵屯大理國取  
道西南將大入邊詔以銀萬兩使思播結約羅鬼爲援  
徐清叟奪資政殿大學士罷祠祿王埜奪端明殿學士  
罷祠仍褫執政恩數丁未太白晝見詔申嚴老鼠隘防  
戍襄樊閫臣奏捷甲寅賜禮部進士史天祥以下六百  
一人及第出身有差六月甲戌朱禕孫太府寺簿知瀘



州兼潼川路安撫任責瀘叙長寧邊防浙江堤成癸未  
董槐罷臺臣丁大全既累疏擊之辭極詆毀且以臺牒  
役偶兵夜半迫槐出關物論殊駭三學生屢上書以爲  
言詔以槐爲觀文殿大學士提舉臨安府洞霄宮詔程  
元鳳蔡抗可輪日判事軍國重務取旨丁亥太白入井  
秋七月甲寅知叙州史俊調舟師與大元兵戰凡十三  
合詔俊官三轉仍帶閣門行宣贊舍人乙卯以程元鳳  
爲右丞相兼樞密使蔡抗參知政事張璠端明殿學士  
簽書樞密院事八月甲子程元鳳上疏言正心待臣進  
賢愛民備選守法謹微審令入事九月壬辰西南蕃呂  
告蠻日寧名天兄弟慕義與烏蘇蠻合力爲國禦難詔  
各補承信郎丙申知邕州程芾以貪暴詔削二秩罷之  
甲寅監察御史朱熠言境土蹙而賦歛日繁官吏增而  
調度日廣景德慶曆時以三百二十餘郡之財賦供一  
萬餘員之奉祿今日以一百餘郡之事力贍二萬四千  
餘員之冗官邊郡則有科降支移內地則欠經常納解  
欲寬民力必汰冗員帝納焉冬十月壬戌太陰犯斗十  
一月戊子朔荆襄閩臣以功狀來上詔推賞將士戊戌  
京湖繼上戰功詔蜀羅兵革吾民重困所當勞來撫靡  
使之樂業比聞官吏乃肆誅求殊失培植邦本之意自

萬曆二十七年刊

宋史卷四十四

本紀

八



今四川制司戒飭屬郡違者罪無赦御史臺其嚴覺察  
乙巳以監察御史吳衍翁應弼劾太學武學生劉黻等  
八人不率詔拘管江西湖南州軍宗學生與伯等七人  
並削籍拘管外宗正司癸丑以張礪同知樞密院事丁  
大全端明殿學士簽書樞密院事馬天驥端明殿學士  
同簽書樞密院事詔戒羣臣洗心飭行毋縱於貨賄其  
或不悛舉行淳熙成法又開國以來勳臣之裔有能世  
濟其美而不世其祿者所在州郡以聞參知政事蔡抗  
輒擅去國勉留不返詔授職予祠尋以杯存言寢其命  
十二月戊午朔熒惑犯填星庚申大元城棗陽乙丑以

張礪兼參知政事甲戌熒諭荆闔吳淵其有功將士趙  
上姓名等第推賞

五年春正月丁亥朔以趙葵爲少保寧遠軍節度使京  
湖宣撫使判江陵府兼夔路策應大使進封衛國公賈  
似道進知樞密院事職任依舊吳淵參知政事李曾伯  
荆湖南路安撫使兼知潭州吳潛趙與憲各官一轉乙  
巳雷丙午禁姦民作白衣會監司郡縣官等失覺察者  
坐罪辛亥吳淵薨贈少師諡莊敏二月戊午四川嘉定  
上戰功以賈似道爲兩淮安撫使辛酉命趙葵兼湖廣  
總領財賦余晦淮西總領財賦壬戌築思州三隘丁丑



布衣余一飛高杞陳襄陽備禦策詔命趙葵行之夏四月丁卯詔襄陽安撫高達以白河戰功轉行右武大夫帶遙郡防禦使王登以沮河督戰官一轉升直祕閣並職任依舊巳卯大元兵攻苦竹隘詔京湖調兵應援閩四月巳丑程元鳳等進玉牒日曆會要經武要略及中興四朝志傳甲午詔徐敏子嚴防邕宜巳酉以呂文德知靖州職任依舊祈雨五月庚申雨丁卯城荆山置懷遠軍荆山縣詔賈似道官兩轉戊寅詔京湖沿江海道嚴備舟師防遏辛巳復以劍門壘賞蒲擇之官兩轉朱禩孫蒲黼楊大淵韓勇各官四轉壬午夏貴正任吉州刺

史帶御器械鎮江駐劄都統制知懷遠軍六月丙戌太白歲星合於翼辛卯太陰入氐丁酉祈雨馬天驥以臺臣言罷詔依舊端明殿學士提舉臨安洞霄宮秋七月丙辰祈雨戊午雨巳未太白晝見丁卯有流星大如桃丙子太陰入井八月丙戌光化軍奏捷台州火癸巳詔謝方叔仍舊職蔡抗以資政殿學士並領祠在京甲午給事中邵澤等言謝方叔罪狀詔寢祠命丙申京城火庚子以張礪參知政事丁大全同知樞密院事兼權參知政事巳酉史嵩之薨贈少師諡莊肅九月壬子朔詔今後臺臣遷他職輒出關以違制論仍著爲令辛酉祀



明堂大赦冬十月庚寅張礪薨贈少師癸巳雷甲午虹  
見丁酉以林存簽書樞密院事庚子詔皇子忠王禕授  
鎮南遂安軍節度使皇女進封昇國公主十一月丙辰  
李曾伯兼節制廣南任責邊防乙丑獎諭安南國賜金  
器幣香茗乙亥詔京湖帥臣黃平清浪平溪分置屯戍  
庚辰詔三邊郡縣官毋擅離職守諸制帥臣其嚴糾察  
十二月壬午李曾伯依舊資政殿學士湖南安撫使兼  
廣南制置使移司靜江府丁未熒惑入氏

六年春正月辛亥朔以丁大全參知政事兼同知樞密  
院事林存兼權參知政事癸亥詔出封樞庫銀萬兩付

蜀圖辛未詔授成穆皇后弟太師郭師禹孫善庸承務

郎仍免銓注差癸酉罷李曾伯廣西經略以廣南制置  
大使兼知靜江府其經略司官屬改克制司官屬甲戌  
詔樞密院編脩官呂逢年詣蜀闕趣辦隘屯糶糧餉  
相度黃平思播諸處險要緩急事宜具工役以聞戊寅  
雷二月辛巳朔以馬光祖爲端明殿學士京湖制置使  
知江陵府兼夔路策應湖廣總領財賦并屯田事壬辰  
雨土三月辛亥朔祈雨丙辰馬光祖請以呂文德王鑑  
王登汪立信等克制司參議官及辟制司準備差使等  
官詔光祖開闢之初姑從所請戊辰以馬光祖兼荆湖



北路安撫使庚午熒惑退入氏甲戌詔湖北提點刑獄  
文復之移司江陵兼京湖制司參議官夏四月庚辰朔  
詔自冬徂春天久不雨民失東作自四月一日始避殿  
減膳仰答譴告癸未程元鳳等以久旱乞解機務詔不  
允甲申大雨丙申羣臣三表請御正殿從之丁酉詔田  
應已思州駐劄御前忠勝軍副都統制往播州共築關  
隘防禦己亥臺臣朱熠劾沿江制置副使呂好問黃州  
之役貪酷悞事詔褫職乙巳程元鳳罷以觀文殿學士  
判福州尋提舉洞霄宮丙午趙葵三辭免福建安撫使  
詔授醴泉觀使兼侍讀丁未以丁大全爲右丞相兼樞

密使林存同知樞密院事兼權參知政事朱熠端明殿  
學士簽書樞密院事五月庚戌朔詔襄樊解圍高達程  
大元應援李和城守皆有勞績將士用命深可嘉尚其  
丞議行賞激癸丑詔懷遠連水相繼奏功夏貴官兩轉  
兼河南安撫使毛興轉右武大夫並依舊任丁巳李曾  
伯言廣西多荒田民懼增賦不耕乞許耕者復三年租  
後兩年減其租之半守令勸墾闢多者賞之奏可丙寅  
命嗣榮王與芮判大宗正事丁卯嗣秀王師彌薨六月  
癸巳臺臣戴慶烜劾淮東總領趙與峇奪職鑄秩秋七  
月庚戌城陵霄山詔朱禩孫進一秩易士英帶行閣門



宣贊餘轉官有差癸丑熒惑犯房宿戊午趙葵四辭免  
醴泉觀使兼侍讀乞外祠從之戊辰蜀郡劉整上捷詔  
推恩賞癸酉知平江府余晦以臺臣戴慶炆言曩敗績  
於蜀誤國欺君詔奪寶章閣待制罷任追冒支官錢甲  
戌詔前福建漕臣高斯得已奪職鑄官其贓百餘萬嚴  
限徵償以懲貪吏乙亥呂文德入播州詔京湖給銀萬  
兩八月癸未太陰行犯熒惑戊戌詔上流鎮江防禦癸  
卯詔申嚴倭船入界之禁九月壬子詔蜀廣海道申嚴  
防遏甲寅詔安南情狀正測申飭邊防戊辰安豐上戰  
功有流星透霞冬十月丙子朔詔蜀中將帥雖未克復

成都而暴露日久戰功亦多宜與序升其亟條具以聞  
丁丑以俞興爲四川制置副使知嘉定府兼成都安撫  
副使乙酉詔陝西陝慶府楊禮守安西堡有功官兩轉戊  
子大元兵攻思秦州唐寅廣南劉雄飛奏橫山之功詔  
雄飛官三轉部兵將校官兩轉辛卯詔常州江陰鎮江  
發米振贍淮民十一月己酉林存罷以資政殿學士知  
建寧府癸丑朔州上戰功詔亟推賞以示激厲詔追復  
余玠官職甲寅築黃平賜名鎮遠州呂逢年進一秩詔  
撫諭沿邊將士丙辰給事中張鎮言徐敏子曩帥廣右  
嗜殺黷貨流毒桂府詔仍舊羈管隆興府丁巳葉夢鼎



宋史卷四十四  
本紀  
十三  
依舊職知隆興府壬子以朱熠同知樞密院事兼權參  
知政事饒虎臣端明殿學士同簽書樞密院事賈似道  
樞密使兩淮宣撫使甲子太陰犯權星丁卯東海失守  
賈似道抗章引咎詔令以功自贖特與放罪甲戌淮東  
帥臣奏大元兵退填星熒惑在危十二月戊寅詔改來  
年爲開慶元年庚辰大元兵渡馬湖入蜀詔馬光祖時  
暫移司峽州六郡鎮撫向士璧移司紹慶府以便策應  
癸未房州上戰功丙戌詔置橫山屯丁亥向士璧不俟  
朝命進師歸州損貲百萬以供軍費馬光祖不待奏請  
招兵萬人捐奉銀萬兩以募壯士遂有房州之功詔士  
璧光祖各進一秩辛丑詔李曾伯城築關隘訓練民兵  
峒丁申嚴防邊填星太白熒惑合於室

開慶元年春正月乙巳朔詔飭中外奉公法圖實政馬  
光祖與執政恩數李曾伯進觀文殿學士己酉大元兵  
攻忠涪漸薄夔境詔蒲擇之馬光祖戰守調遣便宜行  
事辛亥詔戍蜀將士頻年戰禦暴露可閔今申命蒲擇  
之從優犒師春防畢日卽與更戍其輒逃歸者從軍令  
癸丑詔呂文德城黃平深入蠻地撫輯有方與官三轉  
庚申詔知賓州呂振龍知象州奚必勝兵至聞風先遁  
兵退乃返金追毀出身文字竄遠郡橫州守臣劉清卿



設隘堅守與官一轉壬戌監察御史章士元言謝方叔  
帥蜀誤國詔方叔更與鐫秩其子脩竄廣南癸亥左司  
諫沈炎言余晦壞蜀幕屬李卓王克已濟惡斂怨詔晦  
卓克已各奪兩官丙寅印應飛依舊職知鄂州兼湖北  
轉運使丁卯賈似道以樞密使爲京西湖南北四川宣  
撫大使都大提舉兩淮兵甲湖廣總領知江陵府蜀帥  
蒲擇之以重兵攻成都不能克大元兵破利州隆慶順慶  
諸郡閬蓬廣安守將相繼納降又造浮梁於涪州之蘭  
市戊辰以李庭芝權知揚州二月乙亥朔詔京西提刑  
王登提兵援蜀功未及成齎志以歿贈官五轉致仕恩  
外仍官一子庚辰以趙與箴爲觀文殿學士兩淮安撫  
制置使兼知揚州乙酉出內庫緡錢三千萬助邊用丙  
戌以馬光祖爲資政殿學士沿江制置使江東安撫知  
建康府行宮留守己丑詔蠲建康太平寧國池州廣德  
等處沙田租壬辰詔蠲漣水軍制司所收屯田租乙未  
發平糶倉米三萬減直振在京民辛丑涪州報大元兵  
退三月庚戌詔印應雷黃夢桂赴都堂稟議命有司縣  
重賞募將士毀蘭市浮梁癸丑詔蜀死節臣雲頂山諸  
處將士咸褒錄其後丁巳以呂文德爲保康軍節度使  
四川制置副使兼知重慶府庚申馬光祖奏大元兵自



烏江還北辛酉雨土夏四月甲戌朔以段元鑑楊禮堅  
守城堡歿於王事詔各贈奉國軍節度使封二字侯立  
廟賜額致仕恩外更官一子成忠郎丁丑以向士璧爲  
湖北安撫副使知峽州兼歸峽施珍南平軍紹慶府鎮  
撫使甲申詔守合州王堅嬰城固守百戰彌厲節義爲  
蜀列城之冠詔賞典加厚乙酉知施州謝昌元自備緡  
錢百萬米麥千石築郡城有功詔官一轉乙未詔賜夏  
貴溧陽田三十頃丙申以呂文德兼四川總領財賦五  
月甲辰朔城金州開州辛亥雨雹乙卯達州上呂文德  
等戰功詔遷補有功將士丁巳詔湖北諸郡去年旱潦

饑疫令江陵常澧岳壽諸州發義米振糶仍嚴戢吏

務令惠及細民乙丑行開慶通寶錢辛未賜禮部進士  
周應炎以下四百四十二人及第出身有差婺州大水  
發義倉米振之六月甲戌呂文德兵入重慶詔諭四川  
軍民共奮忠勇效死勿去有功行賞靡間邇遐有能效  
順來歸悉當宥過加卹仍獎呂文德斷橋通道之功命  
兼領馬軍行司辛巳以朱熠參知政事饒虎臣同知樞  
密院事丙戌南平來報戰功戊戌詔申嚴海道防禦己  
亥詔獎諭賈似道壬寅以李廷芝直寶謨閣湖北安撫  
副使兼知峽州太白晝見秋七月辛亥太白入井癸亥



蔡抗薨贈少保諡文肅以知播州楊文知思州田應庚  
守禦勤勞詔各官一轉八月甲申以濠州統制張斌柘  
塘之戰歿於王事贈官三轉仍與一子下班祗應乙酉  
降人來言大元憲宗皇帝崩於軍中戊子詔吳潛開闡  
海道勤勞三年屢疏求退依舊觀文殿大學士判寧國  
府特進崇國公辛卯命呂文德兼湖北安撫使庚子太  
白犯權呈熒惑九月壬子賈似道表言大元兵自黃州  
沙武口渡江中外震動己未嗣濮王善騰薨庚申以吳  
潛兼侍讀奉朝請戴慶烜端明殿學士簽書樞密院事  
下詔責已勉諭諸閩進兵壬戌詔出內府緡錢千萬銀  
五萬兩帛五萬疋給宣司緡錢五百萬銀二萬兩帛二  
萬疋給沿江副司犒師詔已命御史陳寅趣淮東調兵  
五萬應援上流癸亥趙葵特進觀文殿大學士封衛國  
公判慶元府沿海制置使命侍御史沈炎往沿江制置  
副司趣兵援鄂渚再出內庫緡錢五百萬銀二萬兩帛  
二萬疋給兩淮制司緡錢二百萬銀萬兩帛萬疋給沿  
江制司以備軍賞戊辰太白犯榮惑己巳詔賈似道兼  
節制江西二廣人馬通融應援上流庚午合州解圍詔  
王堅寧遠軍節度使依前左領軍衛上將軍與元府駐  
劄御前諸軍都統制兼知合州節制軍馬進封清水縣



開國伯冬十月辛未朔丁大全罷以觀文殿大學士判鎮江府壬申以吳潛爲左丞相兼樞密使進封相國公賈似道爲右丞相兼樞密使進封茂國公宣撫大使等如舊癸酉命趙葵爲江東宣撫使馬光祖移司江州應援鄂州史巖沿江制置副使移司壽昌軍應援鄂州丙子改封吳潛爲慶國公丁丑詔給還浙西提舉常平司歲收上亭戶沙地租二百萬未勿復徵庚辰詔合州圍解宣闔制臣及二三大將之功宜加優賞呂文德授檢校少師李遇龍進三秩權刑部侍郎各賜金幣將佐以下進秩賜金有差詔自今月十一日始避殿減膳徹樂又詔比者蜀道稍寧然于戈之餘瘡痍未復流離蕩析生聚何資咨爾旬宣之寄牧守之臣輕徭薄賦一意撫摩恤軍勞民庶底興復其被兵百姓遷入城郭無以自存者三省下各郡以財粟振之壬午御史陳寅言知江州袁玠貪贓不悛殘賊州邑詔削玠五秩竄南雄州癸未丁大全落職罷新任乙酉雷丙戌以趙葵爲沿江江東宣撫使置司建康任責捍禦癸巳向士璧權兵部侍郎湖南安撫使兼知潭州任責廣西邊防十一月壬寅以朱熠權知樞密院事饒虎臣戴慶烜金權參知政事癸卯呂文福帶遙郡防禦使河南招撫使知淮安軍詔



追毀袁玠出身以來文字除名不叙移萬安軍戊申詔求直言辛亥舟師戰滸黃洲乙卯詔趙葵授少保觀文殿大學士江東西宣撫使進封益國公其饒信袁臨撫吉隆興官軍民兵金聽節制調遣諮訪罷行黜陟皆得便宜行事以緡錢五百萬銀五萬兩給其用丙辰詔選精銳招信泗州千人楊州拱衛軍千人安豐濠州各千五百人赴京聽調遣庚申夏貴入見帝撫勞甚至閏十一月甲戌詔出內帑緡錢五十萬犒內外諸軍丁丑以向士璧爲湖南制置副使餘職仍舊賜金帶己卯熒惑入氐癸未諸將陶林文通進兵有功詔林帶行遙郡刺史文通轉武功大夫賜銀有差甲申以印應雷爲監淮西總領財賦兼江東轉運判官呂文德檢校少保京西湖北安撫使兼制置使知鄂州兼侍衛馬軍都指揮使己丑皮龍榮兼資善堂翊善庚寅陶林奏沼山寺戰功癸巳向士璧連以功狀來上乙未詔降周震炎第四甲出身丙申賈似道表大戰數合皆有功十二月己亥朔賈似道言鄂州圍解詔論功行賞丁未熒惑犯房宿鉤鈐星辛亥詔改來年爲景定元年壬子改封吳潛爲許國公賈似道爲肅國公



宋史卷四十五

景定元年壬子如桂吳翥  
原於

宋史卷四十五

本紀第四十五

開府儀同三司上柱國錄軍國重事同中書右丞相監修國史領經筵事都總裁脫脫等脩

皇明朝列大夫國子監祭酒 臣方從哲

承德郎右春坊右中允管國子監司業事 臣黃汝良等奉

勅重校刊

理宗五

景定元年春正月丙子詔獎賈似道功庚辰歲星熒惑合在尾壬辰詔知涪州趙域聚糧不運餉兵士遂為北有已削一秩罰輕再削兩秩乙未潼川城仙侶山賈似道言高達守鄂州城凡三月大元師北還二月丙午詔

萬曆二十七年刊

宋史卷四十五

本紀

一



賈似道以緡錢三十萬犒師并示賞功之典巴西以高  
達爲寧江軍承宣使右金吾衛上將軍賜緡錢五十萬  
呂文德賜緡錢百萬浙西良田百頃鄂州戰守將士賜  
緡錢三十萬王鑑孫虎臣蘇劉義等各官十轉高達遷  
湖北安撫副使知江陵府兼夔路策應使陳奕阮思聰  
並正任防禦使江西湖南帥司言大元兵破瑞州臨江  
軍城興國壽昌洪撫全永衡諸郡民皆被兵存者奔竄  
它所甲寅詔臨江守臣陳元桂死節官五轉贈寶章閣  
待制與一子京官一子選人恩澤給緡錢十萬治葬立  
廟死所謚曰正節瑞州守臣陳昌世治郡雖有善政兵  
至民擁之以逃以棄城失守削三秩勒停乙卯詔孫虎  
臣和州防禦使張世傑以下十三人各官五轉立功將  
士並補兩官資賜銀絹庚申雨雹辛酉大元遣偏師自  
大理由廣南抵衡州向士璧會合劉雄飛逆戰於道俘  
民獲還者甚衆詔雄飛升保康軍承宣使餘轉官賜銀  
錢賈似道賜金器千兩幣千匹命國子監主簿劉錫趣  
召赴闕向士璧遷兵部侍郎職任依舊呂文德高達陳  
奕等各賜金幣有差丙寅大元軍過分寧武寧二縣河  
湖砦都監權巡檢張興宗死之詔贈武翼郎官一子承  
信郎以緡錢三萬給其家湖南諸將溫和轉左武大夫



帶行遙郡刺史李虎官三轉帶行閣門宣贊鄧進帶行復州團練使各賜銀絹旌其守禦之功三月戊辰朔日有食之庚午命夏貴兼黃壽策應使總舟師癸酉以橫山之戰將士效節多死行陣總管張世雄沈彥雄陳喜秦安李孝信鄭俊李安國各贈十官資賜緡錢萬恤其家甲戌賞夏貴鴻宿州白鹿磯戰功遷福州觀察使職任仍舊將士推賞乙亥詔全岳水衡柳象瑞興國南康隆興江州臨江潭州諸縣經兵農民失業應開慶元年以前二稅盡除之癸未賈似道奏類草坪大戰進至黃州乙酉詔范文虎轉左武大夫環衛官黃州武定諸軍都統制張世傑環衛官職任依舊鄂州統制張勝死於漢陽戰陣贈官五轉官其子煥進武校尉丙戌賈似道言自鄂趨黃與北朝回軍相遇諸將用命捍禦詔孫虎臣范文虎張世傑以下各賜金帛夏四月戊戌朔侍御史沈炎疏吳潛過失以忠王之立人心所屬潛獨不然章汝鈞對館職策乞爲濟邸立後潛樂聞其論授汝鈞正字奸謀叵測請速詔賈似道正位鼎軸詔朱熠戴慶烜輪日判事大政則共議以聞己亥賈似道表言夏貴等戰新生州進至白鹿磯皆身自督戰有功詔赴闕庚子以王堅爲侍衛步軍司都指揮使戊申以劉整知瀘



州兼潼川安撫副使己酉揚州大火吳潛以觀文殿大  
學士提舉臨安府同書宮癸丑進賈似道少師依前右  
丞相兼樞密使進封衛國公朱熠知樞密院事兼參知  
政事饒虎臣參知政事戴慶炯同知樞密院事兼參知  
政事皮龍榮端明殿學士簽書樞密院使己未以夏貴  
爲保康軍承宣使左金吾上將軍知淮安州兼淮東安  
撫副使京東招撫使賜金器幣溧陽田三十頃壬戌進  
馬光祖資政殿大學士職任依舊癸亥以呂文德兼夔  
路策應使丙寅命馬光祖兼淮西總領財賦五月戊辰  
冊詔趙葵依舊少保兩淮宣撫使判揚州進封魯國公

徐清叟觀文殿大學士知建寧府饒虎臣罷壬申李曾  
伯史岩之並落職解官曾伯坐嶺南閉城自守不能備  
禦岩之坐鄂州圍解大元兵已渡江北還然後出兵又  
命程芾任事以致敗績甲戌詔贈呂文信寧遠軍承宣  
使立廟賜額子師憲帶行閣職更與兩子承信鄧輔周  
和州防禦使錄其白鹿磯死事乙亥詔李虎馭軍無律  
貸命追奪竄鬱林州丁丑賜賈似道玉帶庚辰戴慶炯  
卒贈資政殿大學士壬午熒惑犯斗癸未以皮龍榮兼  
權參知政事沈炎端明殿學士同簽書樞密院事馬塋  
鄂州都統制駐劄江陵府甲申祈雨戊子詔饒虎臣以



資政殿學士提舉臨安府洞霄宮任便居住楊棟召赴  
闕壬辰以姚希得爲敷文閣待制知慶元府兼沿海制  
置使乙未詔李庭芝起復秘閣修撰主管兩淮安撫制  
置司公事兼知揚州六月丁酉朔夏貴奏淮安戰功庚  
子竄丁大全於南康軍壬寅詔立皇子忠王禛爲皇太  
子賜字長源戊申王埜卒壬子賜李遇龍金帶陳奕帶  
御器械依舊鎮江駐劄御前諸軍都統制賜田三十頃  
詔升巢縣爲鎮巢軍甲寅楊棟葉夢鼎並太子詹事乙  
卯陳韓進一秩福建安撫使知福州徐清叟觀文殿學  
士知泉州秋七月丁卯朔皇太子入東宮行冊禮大赦  
壬申貴妃閻氏薨賜諡惠昭東南有星如太白丁亥命  
皇太子昕朝侍立戊子上謂宰執曰北朝使來事體當  
議賈似道奏和出彼謀豈容一切輕徇儻以交鄰國之  
道來當令人見乙丑侍御史何夢然劾丁大全吳潛欺  
君無君之罪庚寅賈似道兼太子少師朱熠皮龍榮沈  
炎並兼賓客辛卯詔丁大全削三秩謫居南安軍吳潛  
奪觀文殿大學士罷祠削二秩謫居建昌軍癸巳詔舉  
孝廉八月壬寅以程元鳳爲淮浙發運使判平江府己  
酉太陰犯填星詔皇太子受冊畢賈似道朱熠皮龍榮  
沈炎各進一秩東宮官吏諸軍兵等官一轉餘皆推恩



壬子與憲薨贈少師諡忠憲太白犯房壬戌李曾伯史  
岩之各削二秩甲子饒虎臣削二秩奪資政殿學士罷  
祠九月癸酉守瀘州劉整以功來上丁丑知漳州節制  
屯戍軍馬洪天錫言援例劾辟幹官一員報行軍機密  
文字奏可辛巳祀明堂大赦丙戌榮惑犯壁戊子李松  
壽犯淮安冬十月乙未朔詔申嚴邊防甲辰詔黨丁大  
全吳潛者臺諫其嚴覺察舉劾以聞當寘於罪以爲同  
惡相濟者之戒時似道專政臺諫何夢然孫附鳳桂錫  
孫劉應龍承順風指凡爲似道所惡者無賢否皆斥帝  
弗悟其奸爲下是詔戊申李松壽修南城詔趣淮閩調  
兵毀之壬子破李松壽兵於漣水城下夷南城舊址乙  
卯有星自東北急流向太陰壬戌竄吳潛於潮州十一  
月丙寅詔內侍何時修削二秩永罷不叙洪燾知臨安  
府兼浙西安撫使壬午以中軍統制知簡州馬千權興  
州都統兼知合州戊子熒惑與填星順行太陰犯房十  
二月甲午朔詔華亭奉宸莊其隸外廷助軍餉包恢叙  
復元官職知常州辛丑建陽縣嘉禾生一本十五穗詔  
改建陽爲嘉禾縣甲寅呂文德上夔路戰功乙卯少師  
廬陵郡王思正薨諡簡惠印應雷直徽猷閣知江州主  
管江西安撫司公事節制斬黃興國三郡庚申以監察



御史桂錫孫言追寢全子才叙復之命

二年春正月癸亥朔詔監司率半歲具劾去賊吏之數  
來上視多寡爲殿最行賞罰守臣助監司所不及以一  
歲爲殿最定賞罰本路州無所劾而臺諫論列則監司  
守臣皆以殿定罰有治狀廉聲者撫實以聞乙丑城安  
慶詔馬光祖進二秩丁丑命皇太子謁拜孔子於太學  
乙卯福建安撫使陳韓累疏請老詔進一秩守觀文殿  
學士致仕以董槐判福州福建安撫使乙酉詔封張栻  
爲華陽伯呂祖謙開封伯從祀孔子廟庭二月丙申孫  
虎臣戰邳州全師而歸癸卯詔諸路監司申嚴僞會賞

罰之令甲寅進封周國公主二月壬戌朔日有食之乙  
亥故寧遠軍承宣使張祥都統制屠忠進以援蜀之功  
祥贈節度使忠進贈復州團練除恩澤外各更官一子  
承信郎賜緡錢二萬戊寅賈似道等上玉牒日曆會要  
經武要略及孝宗光宗寧宗實錄詔似道皮龍榮朱熠  
沈炎各進二秩夏四月癸巳朔余思忠追毀出身文字  
除名勒停竄新州乙未以皮龍榮參知政事沈炎同知  
樞密院事兼權參知政事何夢然簽書樞密院事俞興  
保康軍承宣使四川安撫制置使丙申呂文德超授太  
尉京湖安撫制置屯田使夔路策應使兼知鄂州李庭



芝右文殿修撰樞密都承旨兩淮安撫制置副使知揚  
州己亥詔申嚴江防壬寅呂文德兼湖廣總領財賦乙  
巳馬天驥資政殿學士知福州福建安撫使呂文福帶  
御器械淮西安撫副使兼知廬州官一轉戊申馬光祖  
進觀文殿學士職任依舊乙卯竄吳潛於循州丙辰竄  
可大全於貴州追削二秩丁巳楊鎮授左領軍衛將軍  
駙馬都尉高達知廬州淮西安撫副使五月癸亥賈似  
道請祠祿詔不允庚午謝方叔叙復觀文殿大學士致  
任戊寅以劉雄飛知夔州夔路安撫使乙酉王堅遷左  
金吾衛上將軍湖北安撫使兼知江陵府六月乙未詔

霖雨為沴避殿減膳徹樂乙巳詔近畿水災安口為甚  
丞講行荒政辛亥以范文虎為左領軍衛大將軍主管  
侍衛步軍司兼馬軍司秋七月甲子蜀帥俞興奏守瀘  
州劉整率所部兵北降由興構隙致變也至是興移檄  
討整辛未制置使蒲擇之坐密通蠟書叛賊羅顯詔竄  
萬安軍太陰犯斗乙亥以厲文翁為資政殿學士沿海  
制置使知慶元府戊寅王惟忠家訟寃詔奪謝方叔合  
得恩數丁大全責授新州團練使貴州安置臺臣吳燧  
奪職罷祠陳大方胡大昌皆鑄官壬午陳韓卒贈少師  
諡忠肅丙戌吳潛責授化州團練使循州安置八月壬



宋史卷四十五  
辰命韓宣兼常德辰沅澧靖五郡鎮撫使呂文德兼四  
川宣撫使范文虎以白鹿磯之功賞七官以五官轉行  
遙郡防禦使餘官給憑丁酉詔奪向士壁從官恩數窮  
竟侵盜掩匿之罪時以兵退遣官會計邊費似道忌功  
欲以汚巖一時間臣士壁及趙葵史岩之杜庶皆責徵  
償信州謝枋得以趙葵檄給錢粟募民兵守禦至是自  
償萬緡壬寅築周國公主館於安濟橋乙巳以江萬里  
爲端明殿學士同簽書樞密院事依執政恩數九月辛  
酉詔湖秀二郡水災守令其亟勸分監司申嚴荒政  
亥李庭芝言李松壽已遁大元使郝經久留真州帝趣

與錫賚經之留謀出賈似道帝惑其言不悟蓋似道在  
鄂時值我世祖皇帝歸正大位撤兵似道自詭有再造  
之功諱言歲幣及講和之事故不使經入見冬十月癸  
巳呂文德言已復瀘州外堡擬卽對江壘石爲城以示  
持久之計從之戊戌雷電甲申詔申獎賈似道鄂州之  
功丙午以何夢然同知樞密院事兼參知政事癸丑程  
元鳳授特進觀文殿大學士醴泉觀使兼侍讀甲寅皇  
太子擇配帝詔其母族全昭孫之女擇日入見寶祐中  
昭孫沒於王事全氏見上上曰爾父死可念對曰臣妾  
父固可念淮湖百姓尤可念上曰卽此語可毋天下迨



開慶丁大全用事以京尹顧岳女爲議大全敗故有是命丙辰沈炎資政殿學士提舉臨安府洞霄宮任便居住十一月己未朔劉雄飛和州防禦使樞密副都承旨四川安撫制置副使兼知重慶府四川總領夔路轉運使庚申周國公主館成詔董宋臣李忠輔各官一轉甲戌資政殿學士致仕汝騰卒贈官四轉諡忠清安南國貢象二丁丑馬光祖提領戶部財用兼知臨安府浙西安撫使下嫁周國公主於楊鎮己卯以鎮爲宜州觀察使賜玉帶尋升慶遠軍承宣使詔駙馬都尉楊鎮家合有賞典楊蕃孫官兩轉楊鐸楊鑑官一轉金直祕閣餘

轉官進封有差癸未封全氏永嘉郡夫人十二月庚寅改竄蒲擇之於南康軍辛卯宰臣奏太子語臣等言近奉聖訓夫婦之道王化之基男女正位天地大義平日所講修身齊家之道當真履實踐勿爲口耳之學請宣付史館永爲世程法從之甲午以皮龍榮兼權知樞密院事何夢然參知政事兼太子賓客馬光祖同知樞密院事兼太子賓客知臨安府己亥太陰犯五車壬寅江萬里依舊端明殿學士提舉臨安府洞霄宮任便居住癸卯冊永嘉郡夫人全氏爲皇太子妃

三年春正月戊子朔詔申飭百官盡言詔量移丁大全



吳潛黨人龔永不錄用壬戌詔陳塏等耆年奉祠宜示  
崇獎陳塏端明殿學士林彬之寶章閣待制史季溫直  
華文閣丁仁直寶謨閣仍龔予祠祿甲子福建路安撫  
使馬天驥進資政殿大學士職任依舊乙丑詔諭西蜀  
郡縣等官已授遇闕毋遙受虛批月日違期不赴丁卯  
以善諮嗣濮王戊辰周國公主進封周漢國公主庚午  
賜賈似道第宅於集芳園給緡錢百萬就建家廟甲戌  
詔權知梁山軍李鑑守城有功帶行閣門宣贊舍人就  
知梁山軍復瀘州改爲江安軍呂文德進開府儀同三  
司二月丁亥朔臨安安吉嘉興屬邑水民溺死者衆詔  
守臣給棺瘞之詔獎諭制置司其立功參贊將士進秩  
升職犒給有差乃裕授檢校少保以皮龍榮爲資政殿  
大學士知潭州湖南安撫使乙巳太陰人氏戊申詔省  
試中選士人覆試於御史臺爲定制庚戌李璫以漣海  
三城叛大元來歸獻山東郡縣詔改漣水爲安東州授  
璫保信寧武軍節度使督視京東河北等路軍馬齊郡  
王復其父李全官爵璫卽松壽三月乙丑以孫附鳳爲  
端明殿學士簽書樞密院事兼太子賓客辛未詔升海  
州東海縣爲東海軍丁丑汪立信升直華文閣知江州  
主管江西安撫司公事節制蘄黃興國三郡軍馬庚辰



呂文福依舊職差知濠州兼淮西招撫使夏四月庚寅  
太白晝見庚子熒惑與歲星合在危甲辰有流星大如  
杯五月壬戌熒惑犯壁壘陣丙寅雨雹已巳詔廣西靜  
江屯田小試有效其邕欽宜融柳象潯諸州守臣任責  
指置經略安撫以課殿最仍條具來上辛未馬光祖以  
病請祠詔知福州兼福建安撫使丁丑賜禮部進士方  
由京以下六百三十七人及第出身庚辰夏貴上蘄縣  
戰功六月戊子詔李璿受圍給銀五萬兩下益都府犒  
師遣青陽夢炎率師援之庚寅以孫附鳳兼權參知政  
事楊棟端明殿學士同簽書樞密院事兼太子賓客壬  
辰吳潛沒於循州詔許歸葬己亥董槐乞致仕詔授特  
進戊申詔青陽夢炎援李璿不俟解圍輒提援兵南歸  
諭制置司劾之己酉有流星大如熒惑庚戌安南國王  
日曩上表乞世襲詔授檢校太師安南國王加食邑男  
威冕授靜海軍節度觀察處置使檢校太尉兼御史大  
夫上柱國安南國王劾忠順化功臣仍賜金帶器幣鞍  
馬癸丑詔應謫臣僚終於貶所者許令歸葬秋七月丙  
辰詔州縣官廩祿不時給者御史臺覺察或以他物折  
支計贓論罪壬戌董槐薨贈少師諡文清庚午周漢國  
公主薨賜諡端孝壬申江州都統聶世興調遣入蜀託



疾憚行詔奪二秩押往京湖制司自效戊寅侍御史范  
純文言前四川制置使俞興妬功啓戎罷任鐫秩罰輕  
乞更褫奪以紓衆怒奏可辛巳詔重脩吏部七司條法  
癸未詔申嚴諸路郡縣苛取苗米之禁甲申夜有白氣  
亘天八月甲午海州石湫堰成詔知州張漢英帶行遙  
郡刺史馬步軍副總管帶行環衛官丁酉築蘄州城知  
州王益落階官正任高州刺史制置使汪立信上新城  
圖詔獎諭戊戌李璫兵敗爲大元所誅事聞詔沿邊諸  
郡嚴邊防汪立信升直敷文閣主管沿江制置司公事  
知江州主管江西安撫司公事癸卯太陰犯昴乙巳沿

江制置使姚希得進寶章閣學士職任依舊九月壬申  
召陳奕赴樞密院稟議丙子有流星大如太白丁丑溫  
州布衣李元老讀書安貧不專科舉今巳百四歲詔補  
迪功郎致仕本郡給奉閏九月甲申朔太白晝見丙戌  
流星透霞大如太白戊戌詔刑部長貳大理卿少卿歲  
終無評事可舉卽舉在京三獄官庚子有流星大如太  
白丙午詔應知縣罪罷雖經赦毋注緊望闕著爲令戊  
申詔紹興府火給貸居民錢今及二載民貧可憫悉除  
勿徵冬十月乙卯詔蠲四川制總州縣鹽酒權額巳未  
太陰犯歲星甲子以楊棟簽書樞密院事兼權參知政



事兼太子賓客葉夢鼎端明殿學士同簽書樞密院事  
兼太子賓客丁卯呂文德言遣將校禦敵多逗遛不進  
且奏功失實具姓名上聞詔呂文煥王達趙真削兩秩  
馬堃王甫削一秩餘貶降有差太陰犯五車星庚午太  
白入氐甲戌歸化州岑從毅納土輸賦獻丁壯爲王臣  
詔改歸化爲來安州從毅進秩脩武郎知州事令世襲  
丙子詔安豐六安縣升軍使十一月壬辰丁大全竄貴  
州招游手立將校置弓矢舟楫縱僕隸淫虐軍民詔奪  
大全貴州團練使移置新州癸巳馬光祖乞祠祿詔提  
舉臨安府洞霄宮任便居住丙申徐清叟薨贈少師諡  
忠簡丁酉資陽砦主萬戶小哥及其子衆家奴叛來攻  
詔小哥賜姓王名永堅補武翼大夫夔路副總管重慶  
府駐劄戊戌以夏貴知廬州淮西安撫副使丁未皇孫  
容州觀察使封資國公焯薨贈保靜軍節度使廣國公  
熒惑填星合在婁十二月辛巳呂文德累疏辭兼四川  
宣撫詔仍兼四川策應使

四年春正月壬午朔詔侍從臺諫給舍卿監郎官以上  
及制總監司各舉所知不拘員限不如所舉行連坐法  
戊子林希逸言蒲陽布衣林亦之陳藻有道之士林公  
遇幼承父澤奉親不仕詔林亦之陳藻贈迪功郎林公



遇元官上進贈一官詔董宋臣同提舉奉安符寶所仍  
奉祠祿己亥嚴州火丙午詔革詞訴改送之弊二月癸  
丑詔吳潛丁大全黨人遷謫已久遠者量移近者還本  
貫並不復用丁大全溺死滕州詔許歸葬詔俞興往歲  
失陷瀘城更削一秩丁巳置官田所以劉良貴爲提領  
陳訾爲檢閱戊午日暈周匝乙亥呂文德浚築鄂州常  
澧城池訖事詔獎之守臣韓宣轉遙郡承宣使蘇劉義  
吉州刺史三月丁亥以呂文德爲寧武保康軍節度使  
職任依舊劉雄飛樞密都承旨四川安撫制置使兼知  
重慶府四川總領財賦夔路轉運使加授姚希得刑部

尚書李庭芝兵部侍郎朱禩孫太府卿汪立信太府少  
卿並依舊任壬辰太陽赤黃暈丁酉以王堅知和州兼  
管内安撫使呂思望知濠州兼淮西招撫使庚子以何  
夢然兼權知樞密院事丁未詔知寧國府趙汝楨推行  
經界不擾而辦職事脩舉升直華文閣依舊任戊申忠  
州防禦使貴傑授福州觀察使夏四月乙卯太陰犯權  
星丙寅官田所言知嘉興縣段浚知宜興縣葉哲佐買  
公田不遵元制詔罷之戊辰大陽赤黃暈不匝五月庚  
寅太陰入氏丁酉婺州布衣何基建寧府布衣徐幾皆  
得理學之傳詔各補迪功郎何基建婺州教授兼麗澤書



院山長徐幾建寧府教授兼建安書院山長戊戌四川  
制司言二月甲寅大兵攻嘉定城馬莖出戰禦之詔馬  
莖援夔遷延削一秩令以所轉四官理作叙復流星出  
自角宿距星六月壬子祈雨乙卯京城火丙辰詔饒虎  
臣叙復元官依舊提舉太平興國宮庚甲詔平江江陰  
安吉嘉興常州鎮江六罷已買公田三百五十餘萬畝  
今秋成在邇其荆湖江西諸道仍舊和糶丙寅詔公田  
竣事劉良貴官兩轉陳峋廖邦傑洎六郡官進秩有差  
丁卯流星出自河鼓庚午宰執進玉牒日曆會要經武  
要略及徽宗長編寧宗實錄詔賈似道以下官兩轉秩

十月壬辰敕令所進寧宗以來寬恤詔令戊戌以董宋  
臣爲入內內侍省押班八月甲寅董宋臣以病乞收回  
恩命請祠詔賜告五月乙卯流星出自天倉星九月甲  
申詔趙汝楨爲太府少卿淮東總領財賦辛卯祀明堂  
大赦甲午以何夢然知樞密院事兼參知政事楊棟同  
知樞密院事兼權參知政事葉夢鼎簽書樞密院事冬  
十月己未詔發緡錢百四十萬命浙西六郡置公田莊  
甲子命張珏與元府駐劄御前諸軍都統制兼知合州  
十一月己亥福州火十二月丁未朔詔皇太子宮講官  
詹事以下日輪一員辰入酉出專講讀備咨問以稱輔



導之實已未詔在京置窠柵私繫囚并非法獄具臺憲其嚴禁戢違者有刑辛未太白歲星順行

五年春正月丁丑朔詔崇經術考德行癸巳出奉宸庫珠香象犀等貨下務場貨易助收幣楮庚子太子右諭德湯漢三乞休致授秘閣脩撰知福州福建安撫使二月壬戌流星出自畢甲子太陰犯房丁卯太陰犯斗辛未雨土三月辛巳王堅卒賜諡忠壯馬光祖依舊觀文殿學士沿江制置使知建康府江東安撫使行宮留守已丑日暈周匝夏四月丙午詔管景模妻孥陷沒效忠愈堅平時所得奉入幸以撫恤將士遂至空乏特賜緡

錢二十萬尋賜金帶丁未以夏貴爲樞密都承旨四川

安撫制置使兼知重慶府四川總領夔路轉運使辛亥詔郡邑行鄉飲酒禮癸丑太陰入太微垣乙卯信陽軍將領余元友等提兵防護春耕有功補轉兩官資戊午太白晝見乙丑何夢然馬天驥以臺臣劾罷已巳江萬里以資政殿學士知建寧府李曾伯以觀文殿學士知慶元府沿海制置使庚午太白歲星合於婁五月庚辰何夢然以資政殿大學士知建寧府辛卯以楊棟參知政事葉夢鼎同知樞密院事兼權參知政事姚希得端明殿學士同簽書樞密院事馬天驥提舉洞霄宮甲午



流星出自河鼓大如太白乙未安南國奉表謝恩進方  
物詔却之仍賜金帛以獎恭順己亥太白經天晝見六  
月甲辰朔知衢州謝暨因寇焚掠常山縣棄城遁詔削  
三秩褫職不叙臺臣言衢州詹沔之變乃謝暨任都吏  
徐信苛取激之暨罪重罰輕詔斬信籍其家暨再削兩  
秩勒停丁未詔饒虎臣叙復資政殿學士依前通奉大  
夫差遣如故甲寅加授李庭芝寶章閣直學士依舊任  
朱禩孫右文殿脩撰知靜江府廣西經略使汪立信祕  
閣脩撰樞密副都承旨沿江制置副使兼知江州江西  
安撫使詔呂文德職事脩舉與官一轉太陰犯心戊午

祈雨太白犯天關星乙丑命董宋臣兼主管御前馬院  
御前酒庫戊辰榮惑歲星並行己巳太白太陰並行入  
井庚午太陽赤黃暈秋七月甲戌彗星出柳丁丑詔避  
殿減膳應中外臣僚許直言朝政闕失己卯流星出自  
右攝提星彗星退於鬼辛巳彗星退於井田戊京城大  
火癸巳謝奕昌卒贈少保追封臨海郡王諡莊憲甲午  
填星守畢乙未馬天驥以臺臣劾其貪贓奪職罷祠其  
子時林削一秩罷新任丙申知嘉定府洪濤言新繁縣  
御容殿前枯木再榮殿有畫太祖像又順化人楊嗣光  
等奉太宗真宗仁宗英宗神宗像來歸令櫝藏府中天



慶觀詔本府選差武臣迎奉赴行在所嗣光補武階兩  
資祈雨臺臣言太子賓客楊棟指彗爲蚩尤旗欺天罔  
君詔棟罷職予祠戊戌彗星退於參八月壬寅朔熒惑  
與填星合丙午以楊棟知建寧府戊午彗星消伏甲子  
彗星復見於參辛未彗星化爲霞氣九月己丑日生格  
氣癸巳內侍李忠輔以臺臣劾其貪肆欺罔削兩秩放  
罷乙未建寧府教授謝枋得校文宣城及建康漕闡發  
策十餘問言權奸誤國趙氏必亡左司諫舒有開劾其  
怨望騰謗大不敬竄興國軍冬十月丙午太陰犯斗辛  
亥詔十七界會浸輕並以十八界會易之限一月止乙

丑詔行關子銅錢法每百作七十七文足以一犂十八  
界會之三帝有疾不視朝丙寅大赦丁卯帝崩遺詔皇  
太子禛卽皇帝位咸淳元年三月甲申葬於會稽之永  
穆陵二年十二月丙戌諡曰建道備德大功復興烈文  
仁武聖明安孝皇帝廟號理宗

贊曰理宗享國久長與仁宗同然仁宗之世賢相相繼  
理宗四十年之間若李宗勉崔與之吳潛之賢皆弗究  
於用而史彌遠丁大全賈似道竊弄威福與相始終治  
效之不及慶曆嘉祐宜也蔡州之役幸依大朝以定夾  
攻之策及函守緒遺骨俘宰臣天綱歸獻廟社亦可以



宋史卷四十五  
本紀第四十五  
刷會稽之耻復齊襄之讎矣顧乃貪地棄盟入洛之師  
事釁隨起兵連禍結境土日蹙郝經來使似道諱言其  
納幣請和蒙蔽抑塞拘留不報自速滅亡吁可惜哉由  
其中年嗜慾既多怠於政事權移奸臣經筵性命之講  
徒資虛談固無益也雖然宋嘉定以來正邪貿亂國是  
靡定自帝繼統首黜王安石孔廟從祀升濂洛九儒表  
章朱熹四書不變士習視前朝奸黨之碑偽學之禁豈  
不大有徑庭也哉身當季運弗獲大效後世有以理學  
復古帝王之治者考論匡直輔翼之功實自帝始焉廟  
號曰理其殆庶乎

宋史卷四十五 終

宋史卷四十六

本紀第四十六

開府儀同三司上柱國錄軍國重事前書右丞相監修國史領經筵事都總裁脫等修

皇明朝列大夫國子監祭酒 臣方從哲

承德郎右春坊右中允管國子監業事 臣黃汝良等奉

勅重校刊

度宗

度宗端文明武景孝皇帝諱禛太祖十一世孫父嗣榮  
王與芮理宗母弟也嘉熙四年四月九日生於紹興府  
榮邸初榮文恭王夫人全氏夢神言帝命汝孫然非汝  
家所有嗣榮王夫人錢氏夢日光照東室是夕齊國夫



人黃氏亦夢神人采衣擁一龍納懷中已而有娠及生  
室有赤光資識內慧七歲始言言必合度理宗竒之及  
在位歲久無子乃屬意託神器焉淳祐六年十月己丑  
賜名孟啓以皇姪授貴州刺史入內小學七年正月乙  
卯授宣州觀察使就王邸訓習九年正月乙巳授慶遠  
軍節度使封益國公十一年正月壬戌改賜名改進封  
建安郡王寶祐元年正月庚辰詔立爲皇太子改賜今  
名癸未授崇慶軍節度使開府儀同三司進封永嘉郡  
王二年七月以宗正少卿蔡抗兼翊善時資善堂初建  
理宗制堂記書以賜王十月癸酉進封忠王十一月壬

寅加元服賜字邦壽五年十月庚子授鎮南遂安軍節  
度使景定元年六月壬寅立爲皇太子賜字長源命楊  
棟葉夢鼎爲太子詹事七月丁卯太子入東宮癸未行  
冊禮時理宗家教甚嚴雞初鳴問安再鳴回宮三鳴往  
會議所參決庶事退入講堂講官講經次講史終日手  
不釋卷將晡復至榻前起居率爲常理宗問今日講何  
經荅之是則賜坐賜茶否則爲之反覆剖析又不通則  
繼以怒明日須更復講二年正月丁丑謁孔子於大學  
請以張栻呂祖謙列從祀十二月癸卯冊末嘉郡夫人  
全氏爲皇太子妃五年十月丁卯理宗崩受遺詔太子



卽皇帝位戊辰尊皇后謝氏曰皇太后生日爲壽崇節  
庚午宰執文武百官詣祥曦殿表請聽政不允辛未大  
赦十一月壬申宰執以下日表請視朝不允一丑凡七  
表始從丙戌帝初聽政御後殿命馬廷鸞留夢炎兼侍  
讀李伯玉陳宗禮范東叟兼侍講何基徐幾兼崇政殿  
說書詔求直言又詔先朝舊臣趙葵謝方叔程元鳳馬  
光祖李曾伯各上言以匡不逮召江萬里王燦洪天錫  
湯漢等赴闕詔躬行三年喪復濟王竑元贈少師節度  
使追封鎮王謚昭肅有司討論墳制增脩之加封嗣榮  
王與芮武康寧江軍節度使依前太師判宗正事詔撫  
勞邊防將士監察御史劾宦官李忠輔何舜卿等賊罪  
金竄遠方戊戌詔儒臣日侍經筵輔臣觀講乙未命洪  
天錫以侍御史兼侍讀十二月辛丑詔改明年爲咸淳  
元年行銅錢關子率貫以七百七十文足壬寅戒賊吏  
絕貢羨餘甲辰詔以生日爲乾會節初開經筵講殿以  
熙明爲名禮部尚書馬廷鸞進讀大學衍義序陳心法  
之要是歲兩浙江東西湖南北廣東西福建成都京西  
潼川夔利路戶五百六十九萬六千九百八十九口一  
千三百二萬六千五百三十二大理寺奏大辟三十三  
人



咸淳元年春正月辛未朔日有食之丞相賈似道請爲  
總護山陵使不允尋下詔獎諭癸酉直學士院留夢炎  
疏留似道甲戌諫議大夫朱勣孫等亦請改命不報詔  
臨安免征商三月丙子京湖制置使呂文德辭免不允  
二月庚申置籍中書記諫官御史言事歲終以考成績  
三月癸酉似道乞解機政不允壬午京湖制司劄招鎮  
邊軍甲申葬理宗於永穆陵夏四月壬寅賞四川都統  
咎萬壽雲頂山金堂峽之功及其將士丁木壽崇節免  
徵臨安官私房僦地錢戊申乾會節如上免徵再免在  
京征商三月自是祥慶災異寒暑皆免戊午賈似道請  
授太師己未幸景靈官發米八萬石贍京城民夔路都  
統王勝以李市沙平之戰獲功轉官兩資將士効力者  
上其名推賞五月己巳追命史彌遠爲公忠翊運定策  
元勳閏月乙巳久雨京城減直糶米三萬石自是米價  
高卽發廩平糶以爲常丁未發錢二十萬贍在京小民  
錢二十萬賜殿步馬司軍人錢二萬三千賜宿衛自是  
行慶恤災或遇霪雨雪寒咸賜如上數以江萬里參知  
政事王爚同知樞密院事權參知政事馬廷鸞端明殿  
學士簽書樞密院事丁巳以錢三十萬命臨安府通變  
平物賈丁卯故成都馬步軍總管張順歿於王事詔特



贈官五轉其子與八官恩澤六月乙酉名理宗御製之  
閣曰顯文置學士直學士待制直閣等官戊子沿海制  
置使葉夢鼎三辭免不允己丑名理宗原廟殿曰章熙  
秋七月丁酉太白晝見初命迪功郎鄧道爲韶州相江  
書院山長主祀先儒周惇頤壬寅參知政事江萬里乞  
歸田里不允戊申夔路安撫徐宗武城開達石城乞推  
恩從之壬戌督州縣嚴錢法禁民間用牌帖癸亥以諒  
陰命宰執類試阮登炳以下依廷試例出身禁在京置  
窠柵私繫囚八月庚辰命陳奕沿江按閱軍防賜錢二  
十萬給用丁亥詔有司收民田租或倍克無藝監司其  
嚴禁戢違禁者有刑甲午大元元帥阿木帥大軍至廬  
州及安慶諸路統制范勝統領張林正將高興副將孟  
興逾戰沒於陣詔勝等各官其一子進勇副尉九月己  
酉以洪天錫爲工部侍郎兼侍讀壬子命宰執訪司馬  
光蘇軾朱熹後人賢者能者各上其名錄用癸丑呂文  
德言京湖制帥策應三司官屬乞推恩詔各進一秩庚  
申吏部侍郎李常上七事曰崇廉耻嚴鄉舉擇守令黜  
貪污讞疑獄任儒師脩役法冬十月壬申減四川州縣  
鹽酒課始自景定四年正月一日再免徵三年乙亥減  
田契稅錢什四庚辰江安州潼川安撫司以攻懷簡小



富弼戰圖來上詔優答以賞十一月乙未兄少保保寧  
軍節度使致仕乃裕薨贈少傅追封臨川郡王

二年春正月癸丑江萬里四請歸田乞祠祿不允以爲  
湖南安撫使兼知潭州二月乙巳侍講范東叟奏正心  
之要有三曰進德曰立政曰事天上嘉納焉戊寅詔免  
湖南漕司積年運上峽米耗折逋直辛卯詔左右史循  
舊制立侍御坐前三月庚子賞夔路總管張喜等防護  
開達軍功將士進官有差乙巳詔郡守兩年爲任方別  
授官戊申賜勅書獎諭呂文德夏四月乙丑洪天錫三  
請祠不允以顯文閣待制知潭州兼湖南安撫使甲申

侍御史程元岳言帝王致壽之道在脩德後世休邪  
說以求之往轍可鑒脩德之目有三曰清心曰寡欲曰  
崇儉皆致壽之原上嘉納之丁亥授信州布衣徐直方  
史館編校五月癸丑詔諸節制將帥討軍實節浮費毋  
占役兵士致妨訓練六月丁丑給羅鬼國化州印壬午  
以衢州饑命守令勸分諸藩邸發廩助之秋七月壬辰  
祈雨詔以來年正月一日郊壬寅禮部侍郎李伯玉言  
人材貴乎善養不貴速成請罷童子科息奔競以保幼  
稚良心詔自咸淳三年爲始罷之八月甲申安南國遣  
使賀登位獻方物九月丙辰浙西安撫使李芾以臺臣



黃萬石等言削兩秩免冬十一月辛丑兩淮制置使李  
庭芝立城屯駐武銳一軍以工役費用及圖來上詔獎  
勞之乙卯少師致仕趙葵薨贈太傅賜諡忠靖丁巳利  
東安撫使知合州張珏調統制史炤監軍王世昌等復  
廣安大梁城詔推爵賞有差十二月丁丑申嚴戢貪之  
令甲申以請先帝諡祭告天地宗廟社稷丙戌奉冊寶  
請於南郊上諡曰建道備德大功復興烈文仁武聖明  
安孝皇帝廟號理宗大理寺奏歲終大辟三十五人

三年春正月己丑朔郊大赦丁酉奉皇太后寶上尊號  
曰壽和辛丑壽和太后冊寶禮成謝堂等二十七人各  
進一秩高平郡夫人謝氏等二十二入各進封特封有  
差癸卯冊命妃全氏爲皇后戊申帝詣太學謁孔子行  
舍菜禮以顏淵曾參孔伋孟軻配享顯孫師升十哲邵  
雍司馬光升列從祀雍封新安伯禮部尚書陳宗禮國  
子祭酒陳宜中進讀中庸己酉執經官宗禮講經官宜  
中各進一秩宜中賜紫章服太學武學宗學國子學宗  
正等官若醫官監書庫門庖等各進一秩諸齋長諭及  
起居學生推恩有差乙卯壽和太后親屬謝奕脩郭自  
中黃興在等二十八人各升補一秩二月己未克復廣  
安軍詔改爲寧西軍庚申馬光祖再乞致仕不允乙丑



詔賈似道太師平章軍國重事一月三赴經筵三日一朝治事都堂丙子樞密院言知夔州夔路安撫徐宗武躬立臥龍山堡圍詔宗武帶行遙郡團練使以旌其勞三月癸卯知房州李鑑及將校杜汝隆夏喜以戰龍光砦有功優與旌賞夏四月庚申壽和太后兩次冊寶族兄弟謝奕實等十五人族姪謝在達等四十七人族姪孫謝鏞等十四人各錫銀十兩帛十疋詔大中大夫全清夫儒科發身懇陳換班靖退可尚特授清遠軍承宣使提舉佑神觀仍奉朝請乙酉張珏護合州春耕戰歎龍溪以狀言功詔趣上立功將士姓名五月丁亥朔日

有食之戊申詔曰比常命有司按月給百官奉惟官愈畢去民愈親仍聞過期弗予是吏奉吾命不虔也諸路監司其嚴糾劾六月壬戌加授呂文德少傅馬光祖參知政事李庭芝兵部尚書兼職任仍舊皇后受冊推恩弟全清夫以下十五人官一轉全必樞以下十七人補承信郎癸酉美人楊氏進封淑妃戊寅詔榮王族姻與萊等三十四人各轉官有差秋七月丁亥張珏授正任團練使帶行左領軍衛大將軍賜金帶壬辰樞密院言右武大夫權鄂州都統汪政鄂城戰禦又焚光化城外積聚及攻真陽城皆有功該轉十二官詔轉橫行遙郡



甲午四川都統咎萬壽調統制趙寶揚立等率舟師護糧達渠城以功推賞已酉權黎州張午招諭大青羗主歸義乞用兩林西蕃翰林仍賜予加優從之八月辛酉遣步帥陳奕率馬軍舟師巡邏江防壬戌邊報警急詔諭呂文德等申嚴防遏乙丑太師武康寧江軍節度使判大宗正事嗣榮王與芮進封福王主榮王祀事壬申久雨命在京三獄赤縣道司僉廳擇官審決獄訟毋滯九月乙未詔郡縣折收民田租毋厚直取贏違者論罪癸卯知邕州總統譚淵李旺周勝等繇特磨行大理界率兵攻建水州禽其知州阿孛以下三百餘人獲馬二百餘焚穀米器甲廬舍師還論功各轉官三資軍校補轉有差冬十月庚申復開州賜四川策應司錢百萬勞軍甲戌大雷電十一月丙申故左丞相吳潛追復光祿大夫壬寅賞知房州李鑑調遣路將夏喜統領馮興等均州武陽塢戰功十二月丙辰呂文煥依舊帶行御器械改知襄陽府兼京西安撫副使丁卯臺臣言叙復元官觀文殿學士提舉洞霄宮皮龍榮貪私傾險嘗朋附丁大全乞寢新命詔予祠祿

四年春正月癸未賜呂師夔紫章服金帶已丑呂文德言知襄陽府兼京西安撫副使呂文煥制鄂都統制唐



永堅蠟書報白河口萬山鹿門山北帥興築城堡檄知  
郢州翟貴兩淮都統張世傑申嚴備禦祭已故守合州  
王堅賜廟額曰報忠祭卯沔州駐劄潼川安撫副使胥  
萬壽特升右武大夫帶行左驍衛大將軍賜金帶己酉  
印應雷改知慶元府兼沿海制置使庚戌詔曰邇年近  
臣無謂引去以爲高勉留再三弗近益遠往往相尚不  
知其非義也亦由一二大臣嘗勇去以爲衆望相踵至  
今孟子於齊王不遇故去是未嘗有君臣之情也然猶  
三宿出晝庶幾改之儒者家法無亦取此乎朕於諸賢  
凡謂無負其弗高尚使人疑於負朕閏月庚午賜夏貴

金帶夏四月壬午湯漢三辭免刑部侍郎福建安撫使

庚寅乾會節帝御紫宸殿羣臣稱賀上曰謝方叔託名  
進香擅進金器諸物且以先帝手澤每繫之跋率多包  
藏至以先帝行事爲己功殊失大臣體宜鑄一秩於是  
盧鉞等相繼論列方叔昨蜀廣敗事誤國殄民今又違  
制擅進削一秩罰輕詔削四秩奪觀宸殿大學士惠國  
公罷宰臣恩數仍追寶奎錄并繫跋真本來上丙申右  
正言黃鏞言今守邊急務非兵農合一不可一曰屯田  
二曰民兵川蜀屯田爲先民兵次之淮襄民兵爲先屯  
田次之此足食足兵良策也不報丁酉詔故脩武郎姚



濟死節立廟賜額曰忠壯五月辛酉樞密都承旨高達  
再辭侍衛都虞候乞歸田里命孫虎臣代之壬申賜陳  
文龍以下六百六十四人進士及第出身丙子賈似道  
乞骸骨不允六月辛巳葉夢鼎再乞歸田里不允詔罷  
浙西諸州公田莊官募民自耕輸租租減什三毋私相  
易田違制以盜賣官田論秋七月戊午有星出氐宿西  
北急流入騎官星沒巳未淑妃楊氏親屬楊幼節以下  
百三十四人推恩進秩八月壬寅奉安寧宗實錄理宗  
實錄御集日曆會要玉牒經武要略咸淳日曆三牒賈  
似道葉夢鼎馬廷鸞各補轉兩官諸局官若吏推恩有  
差九月癸未太白晝見大元兵築白河城始圍襄樊冬  
十月戊寅朔日有食之子憲生參知政事常挺六乞歸  
田里詔予郡巳亥巳減四川州縣鹽酒課詔自咸淳四  
年始再免徵三年十一月癸丑樞密院言南平紹慶六  
郡鎮撫使韓宣城渝嘉開達常武諸州有勞繇峽州至  
江陵水陸措置盡瘁以死宜視沒於王事加恩詔宣守  
本官致仕任一子承節郎仍贈正任承宣使丁巳詔知  
江陵府陳奕禪將周全王德等戰西山南谷口田家山  
有功各以等第推賞戊午子鏗生丙寅福建安撫使湯  
漢再辭免乞祠祿詔別授職辛未以文武官在選困於



部吏隆寒旅瑣可閔詔吏部長貳郎官日趣銓注小有未備特與放行違者有刑自是隆寒盛暑申嚴誠飭常挺卒贈少保壬申行義役法十二月辛卯以夏貴爲沿江制置副使兼知黃州癸巳史館狀理宗實錄接續起脩張九成孫象先力學飭行不墜家聲其免一解示表厲命建康府建南軒書院祠先儒張栻戊戌汪立信知潭州兼湖南安撫使職任依舊乙巳詔賞京湖總管張喜趙萬等石門坂堰戰功

五年春正月丁未以李庭芝爲兩淮安撫制置大使兼知揚州壬子京湖策應司參謀呼延德領諸將張喜等

遇北兵戰於蠻河癸亥葉夢鼎累章請老留之固辭依前少保判福州福建安撫使封信國公以馬廷鸞參知政事兼同知樞密院事甲戌以江萬里參知政事二月戊子江萬里辭免參知政事不允三月丙午北帥阿朮自白河以兵圍樊城甲寅葉夢鼎辭免判福州福建安撫使詔不允乙卯皇后歸寧族媼推恩保信軍節度使全清夫以下五十六人各進一秩咸安郡夫人全氏以下三十二人各特封有差大元兵城鹿門己未詔浙西六郡公田設官督租有差辛酉京湖都統張世傑率馬步舟師援襄樊戰於赤灘圃戊辰以江萬里爲左丞相



馬廷鸞爲右丞相兼樞密使己巳以馬光祖知樞密院  
事兼參知政事吳革沿江制置使夏四月丙子賞張世  
傑戰功辛巳江萬里馬廷鸞辭免詔不允壬午知渠州  
張資上蓬州界白土神山蒲渡等處今年春戰功丙戌  
以安西都統張朝寶利東路安撫張珽領兵護錢粟餉  
寧西軍還至水碓頭戰有功詔推賞己丑劉雄飛依舊  
樞密都承旨知沅州兼常德澧辰沅靖五郡鎮撫使癸  
巳李庭芝特進一秩高郵縣夏世賢七世義居詔署其  
門五月己酉馬光祖依舊觀文殿學士提舉洞霄宮乙  
卯程元鳳薨贈少師庚申有星自斗宿距星東北急流  
向牛宿至濁没壬戌詔信陽諸將婁安邦朱興戰于石  
畷呂文煥呼延德戰福山楊青李忠戰石湫俱有勞效  
推賞有差壬申京湖制司言故夔路安撫徐宗武沒於  
王事乞優加贈恤詔致仕恩外特官其一子承節郎六  
月庚辰以呂文福爲復州團練使知濠州兼淮西安撫  
副使甲申皇子昱生辛卯家鉉翁辭免新命詔別授職  
庚子李庭芝辭免兼淮東提舉不允秋七月己酉觀文  
殿學士馬光祖乞守本官致仕詔允所請庚申祈雨壬  
戌東南有星自河鼓距星西北急流至濁没八月戊寅  
詔郡縣收民田租毋巧計取贏毋厚直折納轉運司申



嚴按劾詔襄樊將士戰禦宣力以錢二百萬犒師趣上  
其立功姓名補轉官資九月丙午祈晴辛酉祀明堂大  
赦丙寅明堂禮成加上壽和聖福皇太后尊號冊寶太  
師判大宗正事福王主榮王祀事與芮加食邑一千戶  
冬十月甲申子憲授檢校太尉武安軍節度使封益國  
公己丑呂文德進封崇國公加食邑七百戶以湯漢爲  
顯文閣直學士提舉玉隆萬壽宮兼象山書院山長十  
一月戊辰少傅文德乞致仕詔特授少師進封衛國公  
依所請致仕十二月癸酉文德卒贈太傅賜諡武忠己  
卯以范文虎爲殿前副都指揮使壽和聖福皇太后尊  
號冊寶禮成姪謝堂姪孫光孫等二十八人各轉一官  
餘姻推恩有差甲申以錢二百萬命京湖帥臣給犒襄  
郢等處水陸戍士戊子詔安南國王父陳日嬰國王陳  
威晃並加食邑一千戶大元兵築南新城

六年春正月壬寅以李庭芝爲京湖安撫制置使兼夔  
路策應使印應雷雨淮安撫制置使己酉以錢二百萬  
賜夔路策應司備禦賞給庚戌以高達爲湖北安撫使  
知鄂州孫虎臣起復淮東安撫副使知淮安州辛酉行  
成天曆丁卯上製字民牧民二訓以戒百官戊辰以江  
萬里爲福建安撫使二月辛未檢校少保安德軍節度



使與萊加食邑五百戶丁亥陳宜中經筵進講春秋終  
篇賜象簡金御仙花帶鞍馬丁酉以呂文福爲淮西安  
撫副使兼知廬州己亥朱禩孫權兵部尚書仍四川安  
撫制置總領夔路轉運知重慶府三月庚子朔日有食  
之癸丑詔曰吏以廉稱自古有之今絕不聞豈不自章  
顯而壅於上聞懲其令侍從卿監郎官各舉廉吏將顯  
擢焉癸亥詔贛吉南安境數被寇雖有些若卒寇出沒無  
時莫能相救宜卽要衝立四砦砦屯兵百使地勢聯絡  
禦寇爲便從三郡擇將官領之夏四月戊寅以文天祥  
兼崇政殿說書五月辛丑以吳革爲沿江制置宣撫使

六月庚午詔太極圖說西銘易傳序春秋傳序天下士  
子宜辨其文戊寅賈似道託疾辭退疏十數上上留益  
堅禮異之曰師相而不名馬廷鸞洎省部臺諫學館諸  
司連章請留似道庚辰子憲薨庚寅詔以襄郢水陸屯  
戍將士隆暑露處出錢二百萬命京湖制司給賜秋七  
月復開州己亥更鑄印給之八月甲申瑞安府樂清縣  
嘉禾生詔薦士增四名壬辰詔郡縣行推排法虛加寡  
弱戶田租害民爲甚其令各路監司詢訪亟除其弊詔  
精擇監司守令監司察郡守郡守察縣令置籍考覈歲  
終第其治狀來上癸巳以夏貴能舉職事進一秩詔似



道十日一朝九月庚戌以黃萬石爲沿海制置使壬子  
台州大水冬十月丁丑遣范文虎總統殿司兩淮諸軍  
往襄樊會合備禦賜錢百五十萬犒師己卯詔台州發  
義倉米四千石并發豐儲倉米三萬石振遭水家甲申  
以陳宗禮趙順孫兼權參知政事依舊同提舉編修敕  
令經武要略閏十月己酉安吉州水免公田租四萬四  
千八十石戊午詔殿步馬諸軍貧乏陣沒孤遺者多方  
此隆寒其賜錢二十萬米萬石振之十一月丁丑嘉興  
華亭兩縣水免公田租五萬一千石民田租四千八百  
一十石庚辰詔襄郢屯戍將士隆寒可閱其賜錢二百

萬犒師己丑都統張世傑領兵江防乙未詔陳宗禮進  
一秩爲資政殿學士依所請守兼參知政事致仕十二  
月戊戌陳宗禮卒贈七秩己亥詔唐全張興祖等齋蠟  
書入襄陽往復甚艱各補轉三官賜錢二千緡大元兵  
築萬山城

七年春正月乙丑子昱授左衛上將軍進封建國公詔  
湯漢洪天錫赴闕詔戒貪吏辛未紹興府諸暨縣湖田  
水免租二千八百石有奇三月戊寅發屯田租穀十萬  
石振和州無爲鎮巢安慶諸州饑辛巳日暈赤黃周匝  
乙酉平江府饑發官倉米六萬石吉州饑發和糴米十



萬石皆減直振糶丙戌詔減內外百司吏額戊子發米一萬石徃建德府濟糶詔臨江軍宣聖四十七代孫延之子孫與放國子監試夏四月辛亥免廣東提舉司監籙銀三萬兩甲寅禮部侍郎陳宜中再乞補外以顯文閣待制出知福州兼福建路安撫使五月乙酉賜禮部進士張鎮孫以下五百二人及第出身壬辰發米二萬石詣衢州振糶六月癸巳以錢百萬銀五千兩命知嘉定府督萬壽修城浚壕繕甲兵備禦邊以韓震帶行御器械知江安州兼潼川東路安撫副使馬瑩帶行御器械知咸淳府節制涪萬州臺臣劾朱善孫督綱運受賊四萬五千詔特貸死配三千里禁錮不赦乙未詔以蜀閬調度浩繁賜錢二百萬給用丙申諸暨縣大雨暴風雷電發米振遭水家瑞州民及流徙者饑乏食發義倉米一萬八千石減直振糶巳亥詔以陸九淵孫溥補上州文學巳酉鎮江府轉輸米十萬石於五河新城積貯癸丑以隆暑給錢二百萬賜襄郢屯戍將士丙辰撫州黃震言本州振荒勸分前穀城縣尉饒立積米二百萬靳不發廩雖嘗監貸宜正過糶之罪詔饒立削兩秩武岡軍居住洪天錫三辭召命詔守臣勉諭赴闕戊午紹興府饑振糧萬石巳未兩淮五河築城具完賜名安淮



軍大元會兵圍襄陽秋七月辛未樞密院言吳信周旺  
齎蠟書入襄城往復効勞詔各補官三轉丁丑湖南轉  
運司訪求先儒張栻後人義倫以聞詔補將仕郎壬午  
四川制置使朱禩孫言夏五以來江水凡三泛溢自嘉  
而渝漂蕩城壁樓櫓圯壞又嘉定地震者再被災害爲  
甚乞賜黜罷上答天譴詔不允癸未詔城五河淮東制  
置印應雷具有勞績進一秩宣勞官屬將士皆推恩八  
月壬辰朔日有食之甲午以錢三百萬遣京湖制置李  
庭芝詣郢州調遣犒師丁未命沿江制置副使夏貴會  
合策應以錢二百萬隨軍給用九月乙亥顯文閣直學  
士湯漢顯文閣直學士洪天錫各五辭召命詔並升華  
文閣學士仍予祠祿己丑子焄生冬十月丙申少傅嗣  
秀王與澤薨詔贈少師追封臨海郡王癸丑從政郎朱  
鑒孫進羣經要略己未詔殿步馬諸軍貧乏陣沒孤遺  
者方此隆寒其賜錢二十萬米萬石振之十一月癸亥  
詔民有以孝弟聞於鄉者守令具名上聞將旌異勞  
賜焉己巳詔湯漢官一轉端明殿學士依所請致仕十  
二月甲午詔諸路監司循按刑獄儉從擾民御史臺申  
嚴覺察丙午以錢三十萬命四川制司下渠洋開州寧  
西鎮撫使張朝寶劾司犒師己亥淮東統領兼知鎮江



府趙潛乞祠祿不允謝方叔特叙復元官職惠國公致仕辛亥初置士籍戊午詔舉廉能材堪縣令者侍從臺諫給舍各舉十人卿監郎官各舉五人制帥監司各舉六人知州軍監各舉二人

八年春正月庚申詔朕惟崇儉必自宮禁始自今宮禁敢以珠翠銷金爲首飾服用必罰無貸臣庶之家咸宜體悉工匠犯者亦如景祐制必從重典又詔有虞之世三載考績三考黜陟幽明漢之爲吏者長子孫則其遺意也比年吏習媮薄人懷一切計日待遷事未克究又望而之他吏胥狎玩竊弄官政吾民奚賴焉繼自今內

之郎曹外之牧守以上更不數易其有治狀昭著自宜獎異辛未子昂生巳丑湯漢卒賜諡文清二月癸巳謝方叔卒贈少師前知台州趙子寅歿無所歸特贈直秘閣給沒官宅一區田三百畝養其孤遺以旌廉吏丙午以錢二百萬給犒襄郢水陸戰戍將士三月丙子同知樞密院事兼權參知政事趙順孫授中大夫夏四月戊子知合州利路安撫張珏劾築宜勝山城五月巳巳王燾除觀文殿學士提舉萬壽觀兼侍讀大元兵久圍襄樊援兵阨關險不克進詔荆襄將帥移駐新郢遣部轄張順張貴將死士三千人自上流夜半輕舟轉戰比明



達襄城收軍閱視失張順六月丙申皮龍榮徙衡州丁酉以章鑑爲端明殿學士同簽書樞密院事同提舉經武要略以錢千萬命京湖制司糴米百萬石轉輸襄陽府積貯乙巳以家鉉翁兼權知紹興府浙東安撫提舉司事以唐震爲浙西提點刑獄王燾乞寢新命不允勉諭赴闕辛亥臺臣言江西推排由結局已久舊設都官團長等虛名尚在占愴常役爲害無窮又言廣東運司銀場病民詔俱罷之癸丑以錢五百萬緡命四川制司詣湖北糴運上峽入夔米五十萬石秋七月辛未知靜江府廣西經略安撫使兼計度轉運使胡穎乞祠祿詔勲一轉依所乞宮觀八月丙戌朔日有食之辛丑詔家鉉翁赴闕丁未紹興府六邑水發米振遭水家壬子王燾辭免明堂大禮陪祠乙卯詔福建安撫陳宜中克舉厥職升寶謨閣待制九月丁卯詔洪天錫轉端明殿學士允所請致仕辛未明堂禮成祀景靈宮遂遇大雨吹乘道遙輦入和寧門肆赦庚辰詔以朱禩孫兼四川屯田使乙酉洪天錫卒贈五官諡文毅冬十月己亥紹興府言八月一日會稽餘姚上虞諸暨蕭山五縣大水詔減田租有差丁未以章鑑兼權參知政事右丞相馬廷鸞十疏乞骸骨詔不允庚戌以秋雨水溢詔減錢塘仁



和兩縣民田租什二會稽湖田租什三諸暨湖田租盡  
除之辛亥陳宜中兼給事中十一月乙卯右丞相馬廷  
鸞累疏乞骸骨授觀文殿學士知饒州詔以隆寒殿步  
馬司諸軍貧窶并陣沒孤遺者振以錢粟丙辰陳奕以  
殿前都指揮使攝侍衛步軍司馬軍司已未馬廷鸞辭  
免知饒州乞祠祿詔允所請以觀文殿大學士鄱陽郡  
公提舉洞霄宮壬戌命阮思聰赴樞密院稟議已巳詔  
明堂禮成安南國王陳日熨陳威晃各加食邑一千戶  
賜鞭鞍馬等物十二月甲寅以葉夢鼎爲少傅右丞相  
兼樞密使

九年春正月乙丑樊城破范天順牛富死之癸未詔定  
安豐統制金文彪朱文廣王文顯盛全泲河古河泉河  
珉河等處戰功行賞二月甲申詔鄂州左水軍統制張  
順沒身戰陣贈寧遠軍承宣使官其二子承信郎立廟  
京湖賜額曰忠顯甲午朱禩孫撫緩備禦義不辭難敕  
書獎諭丁未以夏貴檢校少保庚戌呂文煥以襄陽府  
歸大元癸丑以朱澗寺戰功推賞來歸人馬宣沿江都  
統王喜等將士千五百七十餘人三月庚申賈似道言  
邊遽日聞請身督師以勵將帥詔不允四川制司言近  
出師成都劉整故吏羅鑑自北復還上整書豪一秩有



取江南二策其一曰先取全蜀蜀平江南可定其二曰清口桃源河淮要衝宜先城其地屯山東軍以圖進取帝覽奏亟詔淮東制司往清口擇利城築以備之葉夢鼎辭免右丞相詔不允庚午遣金吾衛上將軍阮思聰由平江鎮江及黃州行視城池凡合繕脩增易者亟條奏丙子來歸人方德秀補成忠郎栗勇楊林胡巨川補保義郎劉全補承信郎戊寅賈似道始奏李庭芝表言襄帥呂文煥以城降大元己卯加智萬壽寧遠軍承宣使職任仍舊庚辰夏貴辭免檢校少保不允壬午詔建機速房以革樞密院漏泄兵事稽違邊報之弊賈似道

累疏請身督師詔勉留夏四月詔褒襄城死節右領衛將軍范天順贈靜江軍承宣使右武大夫馬司統制牛富贈金州觀察使各官其二子承信郎賜土田金幣恤其家甲申汪立信權兵部尚書京湖安撫制置使知江陵府夔路策應使湖廣總領不許辭免以錢二百萬給立信開闢犒師葉夢鼎乞致仕遣官勉諭赴都堂治事辛卯以趙潛爲淮西總領兼沿江制置建康留守詔黃萬石赴闕壬辰詔襄陽六年之守一旦而失軍民離散痛切朕心今年乾會節其免集英殿宴以錢六十萬給沿江制置趙潛江防捍禦癸巳知招信軍陳巖乞祠祿



宋史卷四十六  
三十三  
詔曰迺者邊吏弗戒致有襄難將士頻歲暴露邊方蕩  
析離居盡傷朕心爾闔臣專征方面宜身率諸將宣揚  
國威以賞戮用命不用命爾守臣有土有民宜申儆國  
人保固封守爾諸將尚迪果毅一乃心力各以其兵敵  
王所愾今朕多誥爾其悉聰明訓毋懈毋悞習於故常  
功多有厚賞爾不克用勸罰固不得私也又如中外小  
大臣僚有材識超卓明控御之宜懷攻守之略者密具  
以聞一如端拱二年制書朕當虛心以聽李庭芝乞解  
罷詔赴闕壬寅詔復置樞密院都統制副都統制各一  
員丁未以高達爲寧江軍節度使胡北安撫使知峽州  
詔忠州潛藩已升咸淳府刺史王達改授高州刺史李  
庭芝辭召赴闕詔與祠已酉詔南歸人復有戰功者予  
優賞楊春薛聚成陳君謨周海周興各補成忠郎蕭成  
侯喜丁甫劉鑄鄭歸各補承信郎以夏貴兼侍衛馬軍  
都指揮使庚戌詔汪立信賞罰調用悉聽便宜行事辛  
亥呂師夔言比賈似道得李庭芝書報臣叔父文煥以  
襄城降臣聞之隕越無地不能頃刻自安請以經略安  
撫轉運靜江府印委次官護之席藁俟命容臣歸省偏  
親誓當趨事赴功毀家紓難以贖門戶之愆以報君父  
之造詔不允五月乙卯以黃萬石權戶部尚書兼知臨



安府浙西安撫使四川制司朱禔孫言所部諸縣除正  
辟文臣外諸郡屬邑許今本司不拘外縣一體選辟文  
臣以幸蜀之士民奏可丙辰知廬州呂文福言從兄文  
煥以襄陽降爲其玷辱何顏以任邊寄乞放罷歸田里  
詔不允呂師夔五疏乞罷任詔赴闕丁卯申禁奸民妄  
立經會私剗菴舍以避徃徠保伍容苾不覺察坐之辛  
未劉雄飛乞致仕戊寅孝感縣丞關應庚上書言邊防  
二十事詔授武當軍節度推官兼司法京湖制司量材  
任使庚辰馬軍司統制王仙昔在襄樊緣戰陷陣今復  
來歸特與官五轉克殿前司正額統制賜錢一萬布衣  
林椿年等上書言邊防十數事詔諸人上書凡言請以  
丞相似道督視者不允餘付機速房六月刑部尚書兼  
給事中陳宜中言樊城之潰牛富死節尤著以職卑贈  
恤下范天順一階未愜輿情詔加贈富寧遠軍承宣使  
仍賜土田金幣恤其家前四川宣撫司參議官張夢發  
詣賈似道上書陳危急三策鎮漢江口岸曰城荆門軍  
當陽界之玉泉山曰峽州宜都而下聯置堡砦以保聚  
流民且守且耕并圖上城築形勢賈似道不以上聞下  
京湖制司審度可否事竟不行成都安撫使胥萬壽去  
冬調將士攻毀成都大城今春戰礪門五月遣統制楊



國寶領兵至雅州統領趙忠領兵至眉州兩路捍禦有  
勞詔具將士宣力等第姓名以聞呂文福言文煥爲人  
扶擁以襄陽降非由己心詔與李庭芝元陳異同其審  
覈以聞庭芝表向在京湖來歸人吳旺等備言文煥父  
子降狀先納完鑰旋獻襄城且陳策攻郢州請自爲先  
鋒言人人同制司案辭可徵非敢加誣人罪詔文福勉  
力捍禦毋墜家聲京湖制司言去年冬間探司總管劉  
儀盛聰總制趙鐸領精銳至均州文龍崖立砦呂文煥  
旣降均城受敵知郡劉懋偕劉儀等扞禦宣勞詔懋升  
右武大夫帶行左衛大將軍仍舊職儀添差荆湖北路  
兵馬鈐轄聰添差鄂州兵馬鈐轄各官三轉將士官兩  
轉左藏東庫蹇材望上書言邊事大可憂者七急當爲  
者五不報丙戌劉雄飛卒特贈一官戊子京湖制司請  
給器械詔內軍器庫選犀利者賜之仍贈錢百萬備脩  
繕四川制置朱禩孫言月奉銀計萬兩願以犒師向後  
月免請詔常祿勿辭己丑給事中陳宜中言乞正范文  
虎不力援襄之罰詔文虎降一官依舊知安慶府安南  
國進方物特賜金五百兩帛百疋癸卯汪立信言臣奉  
命分關延見吏民皆痛哭流涕而言襄樊之禍皆由范  
文虎及俞興父子文虎以三衙長聞難怯戰僅從薄罰



猶子天順守節不屈猶或可以少贖其愆興奴僕庸材  
器量褊淺務復私讎激成劉整之禍流毒至今其子大  
忠挾多資爲父行賄且自希榮進今雖寸斬未足以快  
天下之忿乞寘重典則人心興起事功可圖詔俞大忠  
追毀出身文字除名循州拘管又言守關進義副尉童  
明襄陽破拔身來歸且嘗立功開州乞補轉四官詔特  
與官兩轉閏月辛亥命殿前指揮使陳奕總統舟師備  
鄂州黃州江防癸丑來歸人郭珍補成忠郎張進張春  
張德林向德成王全婁德王興各補承信郎丙辰朝散  
郎師顯行進注皇朝文鑑前臨安府司法梁炎午陳攻  
守之要五事不報命大理寺丞鍾蜚英點視沿江堡隘  
兵船戊辰知叙州郭漢傑言馬湖蠻王汝作鹿巫蠻王  
沐丘帥蠻兵五百餘助官軍民義阻險馬湖捍禦有功  
詔賞汝作沐丘金帛及其部兵有差叙州總管曹順一  
軍凡在戰陣者趣具立功等第來上秋七月丁亥權紹  
興府節制紫城軍義文榮鼎及將校趙居敬丁福孟青  
蒲祥白貴史用羅宜王繁等九人成都之役沒於兵各  
追贈官秩仍官其子癸巳知達州趙章知開州鮮汝忠  
知渠州張資等復洋州戊戌張珏等復馬騾山八月癸  
丑權知均州徐鼎總管盛聰戰房州胡師峪板倉乙卯



知房州李鑑調權竹山縣王國材統制熊權總轄馬宗明戰落馬坪白羊山詔有司各以勞效論賞九月辛巳以章鑑簽書樞密院事兼參知政事陳宜中同簽書樞密院事成都安撫使咎萬壽城嘉定烏尤山乙未以洪燾爲浙東安撫使丙申以黃萬石爲湖南安撫使冬十月巳酉來歸人汪福許文政各官五轉癸丑鎮巢軍和州太平州諸將查文李文用孟浩等十一人以射湖岡萬歲嶺後港及焦湖北岸戰功咸賜爵賞癸亥雷四川制司言何炎向失洋州調知達州趙章等率諸部軍義復之七月又復洋州吳勝堡兩城權檄統轄謝益知洋

州總制趙桂楫知巴州俾任責吳勝堡戡守之事至是以功來上且以二州攝事守臣請命於朝詔與正授丁丑兩淮制置使印應雷告老進一秩致仕李庭芝兩淮安撫制置使賜錢二百萬激犒備禦十一月壬午子熨授左衛上將軍封嘉國公戊子知秦州龔集遣其將王大顯等捍禦水砦有功又獲俘民以還詔水步兩軍將校凡用命者賞激有差甲午以夏貴爲淮西制置使兼知廬州陳奕沿江制置使兼知黃州呂文福知閤門事詔從李庭芝請分淮東西制置爲兩司就命庭芝交割淮東仍兼淮西策應使乙未以夏貴爲淮西安撫制置



使賜錢百萬激犒備禦李庭芝辭免淮西策應使不允  
知安豐軍陳萬以舟師自城西大澗口抵正陽城遇北  
兵力戰詔旌其勞十二月甲子以馬廷鸞爲浙東安撫  
使知紹興府丙寅權參知政事章鑑再乞解機政不允  
丁丑沿江制置使所轄四郡夏秋旱澇免屯田租二十  
五萬石

十年春正月壬午城鄂州漢口堡權總制施忠部將熊  
伯明知秦州龔渠以天長縣東橫山秦潼湖青蒲口等  
處戰功推賞戊子江萬里以疾辭職任詔依舊觀文殿  
大學士提舉洞霄宮乙丑以留夢炎知潭州兼湖南安

撫使庚寅城鄂州沌口西岸堡京湖制司言襄陽勇信  
中軍鈐轄吳信隨呂文煥北往今并妻子冒險來歸詔  
吳信赴闕制司仍存恤其家丙申江東沙圩租米以咸  
淳九年水災詔減什四乙巳丙土二月巳酉以趙順孫  
爲福建安撫使辛酉詔諸制闕就任升除恩數其告命  
衣帶鞍馬閣門勿差人給賜往要厚賂以失優寵制臣  
之意違者有刑三月巳卯免郡縣侵負義倉米七十四  
萬八千餘石夏四月乙卯子昂授左衛上將軍進封未  
國公詔賞沿江都統王達黃侯戰黃連寺之功戊午以  
呂文福爲常德辰沅澧靖五郡鎮撫使知沅州辛酉詔



賞光州守陳岩路分李全許彥德總管何成路鈐仰子  
虎等牛市販丁家莊戰功烏蘇蠻王詣雲南軍前納款  
大元五月丁亥以高世傑爲湖北安撫副使兼知岳州  
總統出戍軍馬辛丑馬廷鸞辭免觀文殿大學士知紹  
興府浙東安撫使詔不允壬寅張珏表請城馬駿虎頭  
兩山或先築其一以據險要六月戊午以銀二萬兩命  
壽春府措置邊防秋七月壬午汪立信乞致仕不允癸  
未帝崩於福寧殿遺詔太子焮卽皇帝位甲申臺臣劾  
閃醫蔡幼習詔奪五秩送五百里州軍居住二子並罷  
閣門職八月己酉上大行皇帝諡曰端文明武景孝皇

帝廟號度宗德祐元年正月壬午葬於永紹陵

贊曰宋至理宗疆宇日蹙賈似道執國命度宗繼統雖  
無大失德而拱手權奸衰敝寢甚考其當時事勢非有  
雄才睿略之主豈能振起其墜緒哉曆數有歸宋祚尋  
訖亡國不於其身幸矣



宋史卷四十七

本紀第四十七

開府儀同三司桂國錄軍國軍事尚書右丞相監脩國史領經筵事都總裁脫等脩

皇明朝列大夫國子監祭酒臣方從哲

承德郎右春坊右中允管國子監司業事臣黃汝良等奉

勅重校刊

瀛國公 二王附

瀛國公名焘度宗皇帝子也母曰全皇后咸淳六年九月巳丑生於臨安府之大內九年十一月授左衛上將軍封嘉國公十年七月癸未度宗崩奉遺詔即皇帝位於柩前年四歲謝太后臨朝稱詔甲申兄昱保康軍節



度使開府儀同三司進封吉王加食邑一千戶弟曷保  
寧軍節度使開府儀同三司進封信王加食邑一千戶  
命平章賈似道依文彥博故事獨班起居丙戌上皇大  
后尊號曰壽和聖福太皇太后皇后曰皇太后又詔以  
生日爲天瑞節戊子命臨安府振贍細民辛卯以朱禩  
孫爲京湖四川宣撫使兼知江陵府壬寅詔撫三邊將  
士命州郡舉遺逸除浙西安撫司兩浙轉運司臨安府  
見進贓賞錢詔求言八月甲辰詔乞言於老臣江萬里  
葉夢鼎馬廷留夢炎趙順孫王燾李庭芝築清河城  
以圖來上詔處芝進一秩宣勞將士具名推賞加知鄂

州李雷應守軍器監知太平州孟之縉尚書兵部員外  
郎知江州錢真孫直寶章閣知鎮江軍洪起畏直敷文  
閣癸丑大霖雨天目山崩水涌流安吉臨安餘杭民溺  
死者亡筭甲寅太皇太后以老不能御正衙命暫以慈  
元殿爲後殿辛酉作度宗廟戊辰以全清夫爲昭信軍  
節度使謝堂檢校少保謝垕保康軍節度使馬廷鸞乞  
骸骨歸田里詔趣之任九月丁丑資政殿大學士光祿  
大夫王燾乞致仕詔不允戊寅發米振餘杭臨安兩縣  
水災餘杭災甚再給米二千石己卯似道乞免答拜從  
之辛巳覆試文武舉士人壬午覆試文武舉士人癸未



大元兵大會於襄陽丙戌丞相伯顏將一軍趣郢州元帥唆都將一軍入淮翟招討將一軍徇荆南丁亥大元軍薄郢州戊子免被水州縣今年田租甲午初開經筵丁酉天瑞節免徵臨安府公私房賃錢一日以金符十三銀符百給夏貴激賞奇功己亥試正奏名進士賜王龍澤以下出身有差壬寅有星見西方委曲如蚓復州副將翟國榮遇大元兵戰爛泥湖死之閩中旱冬十月丙午知達州趙章復洋州加右驍騎尉中郎將大元兵破渠州禮義城知州張資自殺丁未饒州布衣董聲應進諸史纂約兵鑑刑鑑詔聲應克史館編校文字癸丑上度宗諡廣西經略司權參議官邢友龍擊潮州漳州寇破之乙卯令州縣行義田義役丁巳友龍以下諸將各轉官有差大元兵及郢州都統制張世傑力戰禦之遂去由藤湖入漢戊午郢州副都統趙文義追戰全子湖死恤其家庚申贈翟國榮復州團練使官其二子立廟復州壬戌以錢百萬給郢城屯戌將士甲子詔以明年爲德祐元年乙丑以章鑑同知樞密院事兼權參知政事陳宜中签書樞密院事兼權參知政事大元兵徇沙洋城京湖宣撫司遣總管王虎臣援之丙寅城破虎臣與守隘官王大用皆被執熒惑犯鎮星大元兵至新

萬曆二十七年刊  
宋史卷四百十七  
本紀  
三



城戊辰總制黃頴出降己巳副總制仁寧出降都統制  
選居義力戰城破赴火死知復州翟貴以城降閩中地  
震十一月癸酉以朱禩孫爲京湖四川宣撫使丁丑命  
沿江制置使趙潛巡江策應賜錢百萬激賞戰功戊寅  
馬廷鸞力辭浙東安撫使知紹興府詔依舊觀文殿大  
學士提舉洞霄宮贈趙文義清遠軍節度使與其兄威  
武軍節度使文亮共立廟揚州賜名傳忠庚辰以陸秀  
夫爲淮東安撫制置司參議官壬午削諸班直溢額人  
癸未至乙酉覆試特奏名士人丙戌以王燾爲左丞相  
章鑑爲右丞相並兼樞密使似道自九月乞命左右丞  
相至是從之以張晏然兼京湖四川宣撫司參議官乙  
丑至庚寅覆試特奏名士人壬辰至癸巳如上覆試甲  
午括邸第戚畹及御前寺觀田令輸租丁酉加安南國  
王陳日熨寧遠功臣其子威冕奉正功臣十二月癸卯  
朔命建康府太平州池州振避兵淮民以隆寒勞賜京  
湖及沿江戍守將士甲辰詔淮西四郡水旱去年屯田  
未輸之租其勿徵丁未提舉興國宮呂師夔請募兵江  
州詔知州錢真孫同募尚書省以錢米給之癸丑大元  
兵攻陽邏堡夏貴以兵力守武定軍都統制王達戰死  
乙卯大元兵夜以偏師乘雪渡青山磯丙辰都統程鵬



飛鏖戰被重創歸鄂州都統高邦憲屯馬家渡棄舟走  
被執大元兵復攻夏貴於陽邏堡都統制劉成以定海  
水軍戰死貴敗沿江縱兵大掠歸廬州朱禩孫將兵至  
鄂州聞鄂兵敗夜奔江陵府己未權知漢陽軍王儀以  
城降呂文煥以北兵攻鄂州庚申程鵬飛及權守張晏  
然以城降幕僚張山翁不屈諸將欲殺之丞相伯顏曰  
義士也釋之詔錢塘仁和兩縣民年七十至九十已上  
者賜帛及酒米癸亥詔似道都督諸路軍馬以步軍指  
揮使孫虎臣總統諸軍所辟官屬皆先命後奏詔天下  
勤王甲子起李芾爲湖南提刑乙丑以高達爲湖北制  
置使兼安撫知江陵府詔邊費浩繁吾民重困貞戚  
道田連阡陌安居暇食有司覈其租稅收之贈王達清  
遠軍承宣使庚午度宗梓宮發引至浙江上埃潮漲絕  
江潮失期日晡不至程鵬飛以北兵徇黃州知州陳奕  
遣人請降於壽昌軍李庭芝以兵勤王辛未命州郡節  
制駐戍經從兵

德祐元年春正月癸酉朔大元兵入黃州甲戌陳奕遣  
人下蘄州并招其子嚴於安東州丁丑知蘄州管景模  
遣人請降於黃州戊寅詔浙東邸第出米減價糶民壬  
午葬度宗於永紹陵大元兵入蘄州癸未似道以呂師



夔權刑部尚書都督府參贊軍事任中流調遣乙酉以  
陳宜中同知樞密院事兼參知政事呂師夔錢真孫遣  
人請降於蘄州丙戌大元兵徇江州知安東州陳巖夜  
遁邳州降知壽昌軍胡夢麟寓治於江州丁亥自殺戊  
子知南康軍葉闇遣人請降於江州似道出師知德安  
府來興國以城降夔路安撫張起巖與其將代德攻開  
州復取之己丑知安慶府范文虎遣人以酒饌如江州  
迎師乙未附度宗神主於新宮以孫虎臣爲寧武軍節  
度使戊戌赦京畿罪池州都統張林遣人請降於江州  
大元兵入安慶范文虎降通判夏椅仰藥死是月知達  
州鮮汝忠以城降二月癸卯似道以宋京爲都督府計  
議官使大元軍中甲辰以黃萬石爲江南西路制置使  
加湖北制置副使高達檢校少保庚戌大元兵入池州  
權守趙卯發自經死宋京如軍中請稱臣奉歲幣不得  
請而還辛亥贈劉成清遠軍承宣使乙卯五郡鎮撫呂  
文福遣所部淮兵入衛降詔褒之丙辰詔勞賈似道命  
都督府歲舉改官如史嵩之故事己未加張起巖福州  
觀察使弋德以下各轉五官庚申虎臣與大元兵戰於  
丁家洲敗績奔魯港夏貴不戰而去似道虎臣以單舸  
奔揚州諸軍盡潰翁應龍以都督府印奔臨安壬戌大



元兵徇饒州知州唐震死之故相江萬里赴水死通判  
萬道同以城降沿江制置大使趙潛知鎮江府洪起畏  
知寧國府趙與可知隆興府吳益皆棄城遁知和州王  
喜以城降建康都統翁福出迎大元兵甲子大元兵至  
臨江軍民盡去知軍鮑廉死之似道上書請遷都乙丑  
下公卿雜議王爚言已不能與大計遂去張世傑將兵  
入衛臨安道饒州復取之其將謝元王海李旺袁恩呂  
再興皆戰死江西提刑文天祥起兵勤王丙寅以天祥  
爲江西安撫副使知贛州趣入衛詔募兵以謝堂爲兩  
浙鎮撫使謝至保寧軍節度使全未堅謝屋金檢校少  
保戊辰徵兩浙福建諸郡廂禁兵之半入衛湖南提刑  
李芾以兵勤王知江陰軍鄭孺棄城遁知無爲軍劉權  
知太平州孟之縉皆以城降己巳大元兵攻嘉定九頂  
山都統侯興戰死以陳宜中知樞密院事兼參知政事  
會淵子同知樞密院事兩浙安撫制置大使兼知臨安  
府文及翁簽書樞密院事倪曾同簽書樞密院事召王  
爚爲浙西江東宣撫招撫大使使居京師以備咨訪遣  
大元國信使郝經等歸庚午加夏貴開府儀同三司令  
以所部兵入衛令長吏給經過兵民錢米一切勿征稅  
應編配拘鎖人除僞造關會疆劫盜放火者餘悉縱之



放免浙西公田逋米及諸處見監贓諸文武官在謫籍者並放自便與叙復改正放參親民加張珏寧遠軍節度使智萬壽信康軍節度使張世傑和州防禦使令將兵入衛陳宜中乞誅似道詔罷似道平章都督予祠趙與可除名令臨安府捕案之招似道潰兵辛未右丞相章鑑遁三月壬申朔詔復茶鹽市舶法似道諸不恤民之政次第除之以公田給佃主令率其租戶爲兵殿前指揮使韓震請遷都陳宜中殺之震所部兵叛攻嘉會門射火箭至大內急發兵捕之皆散走癸酉都統徐旺榮迎大元兵入建康府鎮江統制石祖忠請降於建康命浙西提刑司準備差遣劉經成吳江兩浙轉運司準備差遣羅林浙西安撫司參議官張濡成獨松關山陰縣丞徐垓正將郁天興成四安鎮起趙淮爲大府寺丞成銀樹東壩湖北安撫司計議官吳繼明攻通城縣復取之執縣令以歸遣使召章鑑還朝甲戌以似道爲醴泉觀使大元兵至無錫縣知縣阮應得出戰一軍皆沒應得赴水死詔發兵戍吳江乙亥發兵戍獨松嶺銅嶺詔諭呂文煥陳奕范文虎使通和議息兵以王爚爲左丞相兼樞密使閩中地復大震丙子下詔罪已以陳宜中爲特進右丞相兼樞密使罷章鑑官予祠侍御史陳



過請竄賈似道併治其黨人翁應龍等不俟報而去監  
察御史潘文卿季可乞從過所請乃命捕應龍下臨安  
府獄罷廖瑩中王庭劉良貴游汶朱浚陳伯大董樸貴  
洪起畏鎮江自效丁丑知滁州王應龍以城降已卯杖  
翁應龍刺配吉陽軍命王燾陳宜中龔都督諸路軍馬  
加呂文福福州觀察使庚申贈唐震華文閣待制削萬  
道同三官罷之壬午復吳潛向士璧官知常州趙與鑒  
聞兵至遁常民錢嘗以城降甲申大元兵至西海州安  
撫丁順降乙酉知東海州施居文乞降於西海州知平  
江府潛說友通判胡玉林鎗以城降加張世傑保康軍  
承宣使總都督府諸軍丙戌知廣德軍令狐槩以城降  
徙浙西提點刑獄司於平江府張世傑遣其將闔順李  
存進軍廣德謝洪永進軍平江李山進軍常州丁亥張  
德以下各轉官有差謝元可贈十官有星二闕於中天  
頃之一星隕已丑滁人執王應龍歸於揚州殺之加呂  
文福保康軍承宣使趣入衛文福至饒州殺使者入江  
州降大元庚寅左司諫潘文卿右正言季可同知樞密  
院曾淵子兩浙轉運副使許自浙東安撫王霖龍相繼  
皆遁簽書樞密院文及翁同簽書樞密院倪普諷臺臣  
劾已章未上亟出關遁知安東州孫嗣武以城降雨土



辛卯命在京文武官並轉兩官其畔官而遁者令御史  
臺覺察以聞閩順戰安吉縣復取鳳平張濡部曲害大  
元行人嚴忠範於獨松關執廉希賢至臨安重創死壬  
辰岳州安撫高世傑軍洞庭中大元兵攻之世傑降癸  
巳攻岳州總制孟之紹以城降甲午詔褒諭張世傑閩  
順諸將各轉官有差乙未免安吉縣今年夏田租有戰  
沒者縣令丞恤之丙申顧順攻廣德軍復取之以陳合  
同簽書樞密院事丁酉贈邊居義利州觀察使戊戌赦  
邊城降將罪能自拔而歸者錄之復一州者予知州復  
一縣者予知縣所部僚吏將卒及土豪立功者同賞罷  
章鑑祠官并奪宰輔恩數會淵子削兩官奪執政恩數  
陳過陳堅徐卿孫各削兩官奪侍從恩數趙與鑒追兩  
官罷之遇赦永不收叙罷許自王霖龍令淮東制置司  
用標由庚子徙淮東總領所於江陰軍加吳繼明閤門  
宣贊舍人四月壬寅朔贈趙卯發華文閣待制貶陳過  
平江府雄江軍統制洪福率衆復鎮巢軍甲辰贈江萬  
里太師諡文忠輟視朝二日乙巳大元兵入廣德縣知  
縣王汝翼與寓居官趙時晦率義兵戰鬥山路分孟唐  
老與其二子皆死汝翼被執至建康死之王大川贈三  
官王虎臣贈兩官官其二子丙午大元兵破沙市城都



統孟紀死之監鎮司馬夢求自經死戊申京湖宣撫朱  
禩孫湖北制置副使高達以江陵降京湖北路相繼皆  
下張起巖提兵保飛山己酉命劉師勇戍平江府辛亥  
顧順諸將各轉三官孟唐老贈三官壬子以高斯得簽  
書樞密院事兼權參知政事總統張敏與大元兵戰豐  
城死之癸丑贈五官官其一子阮應得贈十官乙卯以  
福王與芮爲武康寧江軍節度使判紹興府丙辰王爚  
來令如文彥博故事自朝參起居外並免拜以樞密副  
使召夏貴提兵入衛丁巳總制霍祖勝攻溧陽縣復取  
之戊午贈張資眉州防禦使侯興復州團練使乙未文  
及翁倪普並削一官奪執政恩數潛說友削三官奪侍  
從恩數庚申令狐槩除名配鬱林州牢城籍其家知金  
壇縣李成大率義局官舍山縣尉胡傳心陽春主簿潘  
大同濠梁主簿潘大恡進士潘文孫潘應奎攻金壇縣  
取之鎮江統制侯岩縣尉趙嗣濱復助大元兵來戰成  
大二子及大同等皆死執成大以歸壬戌大元兵攻真  
州知州苗再成宗子趙孟錦率兵大戰於老鸛嘴癸亥  
加知思州田謹賢知播州楊邦憲並復州團練使趣兵  
入衛有大星自心東北流入濁没乙丑熒惑犯天江提  
舉太平興國宮常楙請立濟王後丁卯加李庭芝參知



政事戊辰詔宜興溧陽民兵助戰有功特免今年田租  
江陰民被兵其租亦勿收責庚午大元兵至楊子橋楊  
州都撥發官雷大震出戰死是月常德鼎澧皆降五月  
辛未朔命宰執日赴朝堂治事旌德縣城守有功免其  
民今年田租癸酉大元兵至寧國縣知縣趙與糖出戰  
死甲戌淮安總制李宗榮知慶遠府仇子真將兵來勤  
王乙亥加苗再成濠州團練使趙孟錦揚州都統司計  
議官以洪福知鎮巢軍丁丑詔趙潛統軍民船屯江陰  
劉師勇攻常州復取之執安撫戴之泰司戶趙必俗總  
管陸春戰死戊寅淮東兵馬鈐轄阮克已將兵來勤王  
加左驍騎中郎將己卯賜婺州處士何基謚文定王柏  
承事郎加張珏檢校少保四川制置副使知重慶府庚  
辰贈雷大震保康軍節度使辛巳加劉師勇濠州團練  
使其將劉圭以下各轉官有差戊子贈潘大同等官餘  
有功人金轉兩官辛卯貶潛說友南安軍吳益汀州金  
籍其家罷李珣送婺州籍呂文煥孟之縉陳奕范文虎  
家甲午饒信州饑令民入粟補官罷市舶分司令通判  
任舶事淮東西官民兵各轉一官丙申詔張世傑張彥  
阮克已仇子真四道出兵遣使告天地宗廟社稷諸陵  
宮觀己亥勞軍吳繼明復蒲圻通城崇陽三縣加帶行



帶御器械權知鄂州令擇險爲寓詔贈鮑康直華文閣  
官其一子趙與糖直華文閣六月庚子朔日有食之既  
晝晦如夜智萬壽以嘉定及三龜九頂紫雲城降知叙  
州李演將兵援嘉定府遂解歸戰羊雅江兵敗被執辛  
丑太皇太后詔削尊號聖福字以應天戒復魏克愚官  
太學生蕭規唐棣金補承信郎知嘉興府余安裕坐聞  
兵求去貽書朝中語涉不道削一官送徽州徐卿孫削  
一官貶吉州命侍從官已上各舉才堪文武者五人餘  
廷臣各舉三人雖在謫籍亦聽舉之丙午王應麟言開  
慶之禍始於丁大全請凡大全之黨在謫籍者皆勿宥  
從之已酉免廣德軍今年田租及諸郡縣未納綱解王  
應麟繳還章鑑曾淵子錄黃言韓震爲逆二人實芑之  
且淵子芑翁應龍致有逸罰又嘗竊府庫金以遁庚戌  
命削鑑一官放歸田里淵子再削一官徙吉州誅翁應  
龍籍其家辛亥銓試甲寅留夢炎入朝王燾請相夢炎  
乞以經筵備顧問陳宜中請相夢炎乞祠詔二相毋藉  
此求閒以燾爲平章軍國重事一月兩赴經筵五日一  
朝宜中左丞相兼樞密使都督諸路兵乙卯詔求言知叙州郭漢傑以城  
樞密使都督諸路兵乙卯詔求言知叙州郭漢傑以城  
降丙辰疏決在京罪人免引見戊午知瀘州梅應春以



城降已未以李庭芝知樞密院事兼參知政事庚申知  
富順監王宗義以城降王應麟復繳還會淵子貶吉州  
錄黃癸亥貶韶州丙寅吳繼明諸將各轉官有差丁卯  
朱禩孫除名籍其家秋七月庚午朔江西制置黃萬石  
移治撫州詔還隆興府辛未張世傑諸軍戰焦山下敗  
績甲戌徙似道居婺州廖瑩中除名貶昭州王庭除名  
貶梅州徙會淵子雷州寧國吏楊義忠率義兵出戰死  
乙亥贈武功大夫丁丑徙似道建寧府太白入東井庚  
申加知高郵軍楮一正閤門宣贊舍人知懷遠軍金之  
才帶御器械知安淮軍高福閤門祇候知泗州譚興閣

門宣贊舍人知濠州孫立右衛大將軍賞守邊功壬午  
太白晝見詔饒州被兵令免今年田租路鈐劉用調兵  
入靖州知州康玉劫之通判張起岩入殺玉復靖州癸  
未拘內司局錢餉兵丙戌令權糴公田今年租每石以  
錢十貫給佃主十貫給種戶其鎮江常州江陰被兵者  
勿糴庚寅謫似道爲高州團練使貶循州籍其家糴浙  
西邸第寺觀田米十之三追復皮龍榮官監司郡守避  
事不卽到官者令御史臺覺察以聞辛卯王爚子熈京  
學生劉九臯等伏闕上書言宜中擅權黨似道芘趙潛  
潛說友使門客子弟交通關節其誤國將甚於似道宜



中去遣使四章召之皆不至謝堂乞罷兩浙鎮撫司不  
從張世傑乞濟師不報壬辰下劉九臯等臨安獄罷王  
爚爲醴泉觀使癸巳以夏貴知揚州朱煥知廬州甲午  
遣使召宜中還朝乙未以陳文龍同簽書樞密院事兼  
權參知政事通判婺州張鎮孫聞兵遁罷其官貶胡玉  
連州林鏗韶州金除名沿江招討大使汪立信卒丙申  
削李珣兩官貶潮州以開慶兵禍追罪史嵩之奪其諡  
戊戌遣使召宜中還朝八月己亥朔總制毛獻忠將衢  
州兵入衛辛丑疏決臨安府罪人壬寅右正言徐直方  
遁加夏貴樞密副使兩淮宣撫大使李芾湖南鎮撫大  
使總制戴虎破大南砦轉三官加張起岩太府寺丞知  
靖州劉用以下立功人各轉官有差大元兵駐巴陵縣  
黃沙乙巳吳繼明復平江縣戊申試大學士舍生己酉  
拘閻貴妃集慶寺賈貴妃演福寺田還安邊所庚戌劉  
師勇攻呂城破之癸丑復嘉定七司法丁巳遣使召宜  
中還朝加張世傑神龍衛四廂都指揮使總都督府諸  
兵戊午加劉師勇和州防禦使熒惑犯南斗趙淇除大  
理少卿王應麟封還錄黃言昔內外以寶玉獻似道淇  
兄弟爲甚己未遂罷之甲子以文天祥爲浙西江東制  
置使兼知平江府乙丑揚州文武官轉兩官加吳繼明



湖北招討使朱旺諸將各轉三官九月己巳陳宜中授  
觀文殿大學士醴泉觀使兼侍讀左司諫陳景行請令  
講官坐講陪宿直從之辛未加田謹賢福州觀察使楊  
邦憲利州觀察使趣入衛己卯陳宜中乞任海防不允  
辛巳有事於明堂赦李成大被執不屈死壬午贈五官  
丙戌命文天祥爲都督府參贊官總三路兵會稽縣尉  
鄭虎臣部送似道之貶所至漳州殺之大元兵至泰州  
和州孫虎臣自殺庚寅贈太尉免靖州今年田租辛卯  
徙李珣梧州乙未劉良貴再削兩官貶信州張彥與大  
兵戰敗被執以城降冬十月己亥加張世傑沿江招討

使劉師勇福州觀察使總統出戍兵壬寅宜中來癸卯  
王牒殿災丁未以夢炎爲左丞相宜中爲右丞相並兼  
樞密使都督城臨安辛亥以張世傑爲沿江制置副使  
兼知江陰軍兼浙西策應使丁巳太白會填星戊午領  
戶部材用常楙中書舍人王應麟請立濟王後贈夏椅  
直秘閣徵紹興府處士陸應月爲史館編校文字壬戌  
大元兵發建康參政阿剌罕四萬戶總管奧魯赤將右  
軍出四安鎮趣獨松關參政董文炳范文虎將左軍出  
江入江陰軍丞相伯顏將中軍入常州熒惑犯壘壁陣  
癸亥張全尹玉麻士龍援常州士龍戰虞橋死全奔五



牧朱煥至廬州貴不內煥歸復以爲淮東制置副使陳合坐匿廖瑩中家資奪執政恩數甲子尹玉戰五牧死之張全不戰遁丙寅趣趙潛趙與可鄭端所募兵詔中外官有習兵略者各以書來上是月李世脩以江陰降十一月丁卯朔銅關將貝寶胡岩起攻溧水死贈寶武翼郎岩起朝奉郎庚午以陳文龍同知樞密院事兼權參知政事黃鑪同簽書樞密院命諸制司各舉才堪將帥者十人不限偏裨士卒如不隸軍中者許投匱自薦辛未起居舍人曾唯辭官不允去癸酉贈尹玉濠州團練使麻士龍高州刺史免張全朱華臨陳退師罪丁丑詔被俘將士能率衆來歸者以人數補官能立功者予節鉞諸闔以下官以所招人多寡行賞戊寅大元兵破廣德軍己卯破四安鎮正將胡明等死之召文天祥入衛辛巳會唯削一官免太白犯房壬午大元兵至隆興府黃萬石棄撫州遁轉運判官劉槃以隆興降癸未大元兵破興化縣知縣胡拱辰自殺甲申中書舍人王應麟辭免兼給事中不允大元兵至常州招降不聽攻二日破之屠其城知州姚訢通判陳炤都統王安節皆死劉師勇潰圍奔平江乙酉改宜興縣爲南興軍禮部侍郎陳景行辭官不允去丙戌贈濟王太師尚書令進封



鎮王謚昭肅令福王與芮擇後奉祀賜田萬畝丁亥獨  
松關告急趣文天祥入衛戊子調民兵出守餘杭錢塘  
已丑獨松關破馮驥死之張濡遁鄰邑望風皆遁通判  
平江府鄭疇遁庚寅通判王矩之都統制王邦傑遣人  
迎降於常州辛卯大元兵趨撫州都統密佑逆戰於壁  
邪兵敗死之癸巳以張世傑爲浙西制置副使兼知平  
江府甲午權禮部尚書王應麟遁黃萬石提兵走建昌  
軍乙未左丞相夢炎遁丙申遣使召夢炎還朝賜餘杭  
武康長興縣民錢并免今年田租鄭疇降一官罷通判  
撫州施至道以城降十二月丁酉朔詔許似道歸葬以  
其祖田廬還之戊戌復趙與可爲都督府參議官放李  
珣白便己亥贈王汝翼朝奉郎庚子以吳堅簽書樞密  
院事黃鏞兼權參知政事遣柳岳奉書詣大元軍中稱  
盜殺廢尚書乞班師脩好癸卯以陳文龍爲參知政事  
兼權知樞密院事賜謝堂同進士出身同知樞密院事  
甲辰贈姚訔龍圖閣待制其父希得贈太師陳炤直寶  
章閣馮驥集英殿脩撰嘉興府告急給封樁庫錢爲兵  
備命趙與偃戍縉雲縣復季可官令如龍泉縣募兵乙  
巳以陳景行爲浙東安撫副使戊處州起方逢辰戊淳  
安縣丙午追封呂文德和義郡王丁未出安邊封樁庫



金付浙東諸郡爲兵備大元兵入平江府起吳君權爲  
大府少卿提點臨平民兵遣使召夢炎應麟皆不至戊  
申張世傑入衛加檢校少保降詔獎諭王爚薨輟視朝  
二日乙酉括臨安府州縣馬庚戌柳岳還癸丑遣宗正  
少卿陸秀夫刑部尚書夏士林兵部侍郎呂師孟使軍  
前詔呂文煥趙孟桂通好己未方輿丁廣趙文禮兵皆  
敗歸庚申以柳岳爲工部侍郎洪儒震爲右正言使燕  
祈請大元兵破大洪山知隨州朱端履降權吏部尚書  
丁應奎左侍郎徐宗仁遣癸亥遣使召夢炎不至

德祐二年春正月丁丑朔大元兵自元年十月圍潭州

湖南安撫兼知州李芾拒守三月大小戰數十合力盡  
將破芾闔門死郡人知衡州尹穀亦舉家自焚帥司參  
議楊霆及幕屬陳億孫顏應焱等皆從芾死守將吳繼  
明劉孝忠以城降寶慶降通判曾如驥死之陸秀夫等  
至大元軍中求稱姪納幣不從稱姪孫不從戊辰還太  
皇太后命用臣禮己巳嘉興守劉漢傑以城降庚午同  
簽書樞密院事黃鑄參知政事陳文龍遁以謝堂爲兩  
浙鎮撫大使文天祥知臨安府金末堅浙東撫諭使辛  
未命吳堅爲左丞相兼樞密使常楙參知政事日午宣  
麻慈元殿文班止六人諸關兵盡潰遣監察御史劉昂



奉表稱臣上大元皇帝尊號曰仁明神武皇帝歲奉銀  
絹二十五萬乞存境土以奉蒸嘗癸酉左司諫陳孟虎  
監察御史孔應得遁熒惑犯木星甲戌大元兵至瑞州  
知州姚岩棄城去乙亥以賈餘慶知臨安府丙子命吉  
王是信王昺出鎮丁丑以夏士林簽書樞密院事己卯  
加全末堅太尉參知政事常懋道三學生誓死不去特  
與放釋褐出身以楊亮節爲福州觀察使提舉吉王府  
行事俞如珪爲環衛官提舉信王府行事大元兵入安  
吉州知州趙良淳自經死月暈東井庚辰簽書樞密院  
夏士林遁辛巳祀太乙宮癸未升封吉王是爲益王判

福州福建安撫大使信王昺爲廣王判泉州兼判南外  
宗正事以留夢炎爲江東西湖南北宣撫大使甲申大  
元兵至臯亭山遣監察御史楊應奎上傳國璽降其表  
曰宋國主臣焜謹百拜奉表言臣眇然幼冲遭家多難  
權奸似道背盟誤國至勤興師問罪臣非不能遷避以  
求苟全今天命有歸臣將焉往謹奉太皇太后命削去  
帝號以兩浙福建江東西湖南二廣兩淮四川見存州  
郡悉上聖朝爲宗社生靈祈哀請命伏望聖慈垂念不  
忍臣三百餘年宗社遽至隕絕曲賜存全則趙氏子孫  
世世有賴不敢弭忘是夜丞相陳宜中遁張世傑蘇劉



義劉師勇各以所部兵去乙酉以文天祥爲右丞相兼  
樞密使都督丙戌命天祥同吳堅使大元軍賜家鉉翁  
進士出身簽書樞密院事賈餘慶同簽書樞密院事知  
臨安府戊子知建德軍方回知婺州劉怡知處州梁椅  
知台州楊必大皆降是月知臨江軍滕岩瞻遁二月丁  
酉朔日中有黑子相盪如鷺卯辛丑率百官拜表祥曦  
殿詔諭郡縣使降大元使者入臨安府封府庫收史館  
禮寺圖書及百司符印告敕罷官府及侍衛軍壬寅猶  
遣賈餘慶吳堅謝堂劉岳家鉉翁克祈請使是日大元  
軍軍錢塘江沙上潮三日不至三月丁丑入朝五月丙  
申朝於上都降封開府儀同三司瀛國公是月陳宜中  
等立昞於福州後二年四月昞殂於碭洲陸秀夫等復  
立衛王昺後三年始平之

贊曰司馬遷論秦趙世系同出伯益夫稷契伯益其子  
孫皆有天下至於運祚短長亦係其功德之厚薄焉趙  
宋雖起於用武功成治定之後以仁傳家視秦宜有間  
矣然仁之敝失於弱卽文之敝失於僣也中世有欲自  
強以革其敝用乖其方馴致焚擾建炎而後土宇分裂  
猶能六主百五十年而後亡豈非禮義足以維持君子  
之志恩惠足以固結黎庶之心歟瀛國四歲卽位而天



兵渡江六歲而羣臣奉之入朝漢劉向言孔子論詩至  
殷士膚敏裸將於京喟然嘆曰大哉天命善不可不傳  
於後嗣是以富貴無常至哉言乎我皇元之平宋也吳  
越之民市不易肆世祖皇帝命征南之帥輒以宋祖戒  
曹彬勿殺之言訓之書曰大哉王言一哉王心我元一  
天下之本其在於茲二王者度宗庶子也長建國公昞  
毋淑妃楊氏季永國公昺毋脩容俞氏度宗崩謝太后  
召賈似道等入宮議所立衆以爲昞長當立似道主立  
嫡乃立熈而封昞爲吉王昞信王德祐二年正月文天  
祥尹臨安請以二王鎮閩廣不從始命二王出閣大元

兵迫臨安宗親復以請乃徙封昞爲益王判福州福建  
安撫大使昺爲廣王判泉州兼判南外宗正以駙馬都  
尉楊鎮及楊亮節俞如珪爲提舉大元兵至高亭山鎮  
等奉之走婺州丞相伯顏入臨安遣范文虎將兵趣婺  
召鎮以王還鎮得報卽去曰我將就死於彼以緩追兵  
亮節等遂負王徒步匿山中七日其將張全以兵數十  
人始追及之遂同走温州陸秀夫蘇劉義繼追及於道  
遣人召陳宜中於清澳宜中來謁復召張世傑於定海  
世傑亦以所部兵來溫之江心寺高宗南奔時嘗至是  
有御座在寺中衆相率哭座下奉昞爲天下兵馬都元



帥昺副之乃發兵除吏以秀王與畢爲福建察訪使兼  
安撫知西外宗正趙吉甫知南外宗正兼福建同提刑  
先入閩中撫吏民諭同姓太皇太后尋遣二宦者以兵  
八人召王於溫宜中等沉其兵江中遂入閩時汀建諸  
州方欲從黃萬石降聞昺將至卽閉城却使者萬石將  
劉俊宋彰周文英輩亦多來歸五月乙未朔宜中等乃  
立昺於福州以爲宋主改元景炎冊楊淑妃爲太后同  
聽政封信王昺爲衛王宜中爲左丞相兼都督李庭芝  
爲右丞相陳文龍劉黻爲參知政事張世傑爲樞密副  
使陸秀夫爲簽書樞密院事命吳浚趙潛傅卓李班翟

國秀等分道出兵改福州爲安福府溫州爲瑞安府郊  
赦是日黎明有大聲出府中衆皆驚仆文天祥自鎮江  
亡歸庚辰以爲右丞相兼知樞密院事遣其將呂武入  
江淮招豪傑杜澆如溫州募兵廣東經略使徐直諒遣  
梁雄飛請降於隆興帥府乃假雄飛招討使使徇廣州  
旣而直諒聞昺立命權通判李性道擢鋒軍將黃俊等  
拒雄飛於石門性道不戰俊戰敗奔廣州直諒棄城遁  
六月丙子雄飛入廣州諸降將皆授以官俊獨不受遂  
爲衆所殺吳浚聚兵于廣昌取南豐宜黃寧都三縣翟  
國秀取秀山傅卓至衢信諸縣民多應之者命文天祥



爲同都督七月丁酉進兵南劍州欲取江西是月吳浚  
兵敗於南豐翟國秀聞兵至遂引還傅卓兵敗詣江西  
元帥府降平章阿里海牙破嚴關馬暨退保靜江府八  
月漳州亂命陳文龍爲閩廣宣撫使以討之甲戌秀王  
與翠圍婺州丙子聞大兵至遂解歸以王積翁爲福建  
提刑招捕使知南劍州備禦上三郡黃恮爲同提刑招  
捕使知漳州備禦下三郡張世傑遣兵助吳浚與元帥  
李恒戰兜零兵敗奔寧都興化石手軍亂九月復以陳  
文龍知興化軍東莞人熊飛爲黃世傑守潮惠二州聞  
趙潛至卽以兵應之攻雄飛於廣州壬寅雄飛遁熊飛  
遂復韶州新會令曾逢龍亦帥兵至廣州李性道出迎  
謁飛與逢龍執而殺之衢州守將魏福興出戰福星橋  
死壬子趙潛入廣州是月招討也的迷失會東省兵於  
福州元帥呂師夔張榮寶將兵入梅嶺十月壬戌朔文  
天祥入江州趙潛遣曾逢龍就熊飛禦大軍於南雄逢  
龍戰死熊飛奔韶州大軍圍韶州守將劉自立以城降  
飛率兵巷戰兵敗赴水死十有一月參政阿剌罕董文  
炳將兵至處州李珪以城降甲辰秀王與翠逆戰於瑞  
安觀察使李世達死之與翠及其弟與慮子孟備監軍  
趙由璫察訪使林温被執皆死阿剌罕兵至建寧府執



守臣趙崇鑑知邵武軍趙時賞知南劍州王積翁皆棄  
城去乙巳是入海癸丑大軍至福安州知州王剛中以  
城降是欲入泉州招撫蒲壽庚有異志初壽庚提舉泉  
州舶司擅蕃舶利者三十年是舟至泉壽庚來謁請駐  
蹕張世傑不可或勸世傑留壽庚則凡海舶不令自隨  
世傑不從縱之歸繼而舟不足乃掠其舟并沒其貲壽  
庚乃怒殺諸宗室及士大夫與淮兵之在泉者是移潮  
州是月福興化皆降英德守臣凌彌堅徐夢得等亦降  
十二月辛酉朔趙潛棄廣州遁乙丑制置方興亦遁吳  
浚退走入瑞金戊辰蒲壽庚及知泉州田真子以城降

興化軍陳文龍嬰城不下乙酉通判曹登孫以城降  
文龍被執不屈死是次甲子門至元十四年正月大軍  
破汀關癸巳知循州劉興降壬寅吳浚棄瑞金遁鎮撫  
孔遵入瑞金文天祥走漳州浚尋還汀州降戊申知潮  
州馬發及其通判戚繼祖降癸丑復來歸丁巳權知梅  
州錢榮之以城降二月大軍至廣州縣人趙若岡以城  
降廣東諸郡皆降三月文天祥取梅州陳文龍從于瓚  
舉兵殺守將林華據興化軍四月文天祥取興國縣廣  
東制置使張鎮孫襲廣州取之梁雄飛等棄城走韶州  
五月張世傑將兵取潮州文天祥提兵自梅州出江西



入會昌縣淮民張德興亦起兵殺大湖縣丞王德顯據  
司空山攻下黃州壽昌軍丁巳遇宣慰鄭鼎戰樊口鼎  
墜水死六月辛酉文天祥取雩都已卯入興國縣七月  
遣兵取吉贛諸縣圍贛州衡山人趙璠撫州人何時皆  
起兵應之乙巳張世傑圍泉州遣將高日新復邵武淮  
兵在福州者欲殺王積翁以應世傑皆爲積翁所戮江  
西宣慰李恒遣兵援贛州而自將兵入興國八月文天  
祥諸將兵皆敗乃引兵卽鄒瀾於永豐瀾兵亦潰巳巳  
熒惑掩月天色赤壬申文天祥兵敗於興國巳卯大軍  
破司空山張德興敗亡走甲申天祥至空坑兵盡潰遂  
挺身走循州諸將皆被執九月元帥峻都援泉州戊申  
張世傑歸淺灣左丞塔出將兵入大庾嶺參政也的迷  
失將兵復取邵武入福州十月甲辰峻都破興化軍陳  
瓚死之進攻潮州馬發拒之乃去攻惠州十月塔出圍  
廣州庚寅張鎮孫以城降元帥劉深以舟師攻是於淺  
灣是走秀山陳宜中入占城遂不及十二月丙子是至  
井澳颶風壞舟幾溺死遂成疾旬餘諸兵士始稍稍來  
集死者十四五丁丑劉深追是至七州洋執俞如珪以  
歸十五年正月大軍夷廣州城張世傑遣兵攻雷州不  
克巳酉大軍克涪州執守將王明二月大軍破潮州馬



發死之三月文天祥取惠州廣州都統凌震轉運判官  
王道夫取廣州昱欲往居占城不果遂駐碭州遣兵取  
雷州曾淵子自雷州來以爲參知政事廣西宣諭使四  
月戊辰昱殂於碭州其臣號之曰端宗庚午衆又立衛  
王昺爲主以陸秀夫爲左丞相是月有黃龍見海中五  
月癸未朔改元祥興乙酉升碭洲爲翔龍縣遣張應科  
王用取雷州應科三戰皆不利用因降六月丁巳應科  
再戰雷州遂死之知高州李象祖降己未昺徙居厓山  
升廣州爲翔龍府己巳有大星東南流墜海中小星千  
餘隨之聲如雷數刻乃己巳卯都元帥張弘範李恒征

厓山七月趙與珞與謝明謝富守瓊州阿里海牙遣馬  
成旺招之與珞率兵拒於白沙口十一月癸巳州民執  
與珞以降閏月庚戌王道夫棄廣州遁壬戌凌震遁癸  
亥大軍入廣州十二月壬午王道夫攻廣州兵敗被執  
凌震兵繼至亦敗文天祥走海豐壬寅被執於五坡嶺  
震兵又敗於芟塘大軍破南安縣守將李梓發死之十  
六年正月壬戌張弘範兵至厓山庚午李恒兵亦來會  
世傑以舟師碇海中碁結巨艦千餘艘中艦外舳貫以  
大索四周起樓棚如城堞居昺其中大軍攻之艦堅不  
動又以舟載茅沃以膏脂乘風縱火焚之艦皆塗泥縛



長木以拒火舟火不能燹二月戊寅朔世傑部將陳寶  
降已卯都統張達以夜襲大軍營亡失甚衆癸未有黑  
氣出山西李恒乘早潮退攻其北世傑以淮兵殊死戰  
至午潮上張弘範攻其南南北受敵兵士皆疲不能戰  
俄有一舟檣旗仆諸舟之檣旗遂皆仆世傑知事去乃  
抽精兵入中軍諸軍潰翟國秀及團練使劉俊等解甲  
降大軍至中軍會暮且風雨昏霧四塞咫尺不相辨世  
傑乃與蘇劉義斷維以十餘舟奪港而去陸秀夫走衛  
王舟王舟大且諸舟環結度不得出走乃負昺投海中  
後宮及諸臣多從死者七日浮尸出於海十餘萬人楊

太后聞昺死撫膺大慟曰我忍死艱關至此者正爲趙  
氏一塊肉爾今無望矣遂赴海死世傑葬之海濱已而  
世傑亦自溺死宋遂亡  
贊曰宋之亡徵已非一日曆數有歸真主御世而宋之  
遺臣區區奉二王爲海上之謀可謂不知天命也已然  
人臣忠於所事而至於斯其亦可悲也夫



朱子語類卷四十一  
本終  
三

Table with 10 columns and 10 rows of faint vertical text.

四十七終

48-11327



